

PROXECTO

orçamentos
2012

LEI
DE MEDIDAS FISCAIS
E ADMINISTRATIVAS



Lei de Medidas Fiscais e Administrativas

CONTIDO

I.	EXPOSICIÓN DE MOTIVOS	7
II.	TÍTULO I: MEDIDAS FISCAIS	15
III.	TÍTULO II: MEDIDAS ADMINISTRATIVAS	53
IV.	DISPOSICIÓN DERROGATORIA	73
V.	DISPOSICIÓN TRANSITORIA	77
VI.	DISPOSICIÓN DERRADEIRAS	81



EXPOSICIÓN DE MOTIVOS

I. EXPOSICIÓN DE MOTIVOS

I

Os orzamentos requiren para a súa completa aplicación a adopción de diferentes medidas, unhas de carácter puramente executivo e outras de carácter normativo, que pola súa natureza deben adoptar rango de Lei e que como precisou o Tribunal Constitucional non deben integrarse nas Leis anuais de Orzamentos Xerais senón en Leis específicas.

O debate doutrinal acerca da natureza das chamadas Leis de acompañamento foi resolto polo Tribunal Supremo, que configurou este tipo de normas como Leis ordinarias cuxo contido está plenamente amparado pola liberdade de configuración normativa da que goza o lexislador e que permiten unha mellor e máis eficaz execución do programa do Goberno nos distintos ámbitos nos que desenvolve a súa acción.

Dende esta perspectiva, tendo presente a actividade que desenvolve a Comunidade Autónoma de Galicia, cuxos obxectivos se explicitan na Lei de Orzamentos Xerais da Comunidade para o ano 2012, e ao obxecto de contribuír a unha maior eficacia e eficiencia destes, o presente anteproxecto de lei contén un conxunto de medidas referidas a diferentes áreas de actividade que, con vocación de permanencia no tempo, contribúen á consecución de determinados obxectivos de orientación plurianual perseguidos pola comunidade a través da execución orzamentaria.

Este é o fin dunha norma cuxo contido esencial o constitúen as medidas de natureza tributaria, se ben se incorporan outras de natureza administrativa.

II

A presente norma legal, contén dous títulos, o primeiro dedicado ás medidas fiscais e o segundo ás medidas de carácter administrativo. O título I consta de dous capítulos, relativos o primeiro aos tributos cedidos e, o segundo, aos tributos propios. O Título II consta de seis capítulos, dedicados, respectivamente, ao réxime financeiro e orzamentario, ás subvencións, ao xogo, ao medio ambiente, á ordenación farmacéutica e á saúde. Tamén contén unha disposición transitoria, unha disposición derogatoria e catro disposicións derradeiras.

Polo que atinxe ás medidas fiscais, contempladas no título primeiro, cumpre sinalar como máis destacadas, as seguintes:

En relación co Imposto sobre a Renda das Persoas Físicas, modifícase a dedución xa existente relativa ao investimento en accións de entidades que cotizan no segmento de

empresas en expansión do Mercado Alternativo Bursátil, co obxecto de aumentar de forma significativa o número de posibles beneficiarios, suprimindo o requisito de posuír polo menos un 1% do capital, co que se facilita o acceso á dedución de pequenos investidores. Así mesmo, amplíase de dous a tres anos o prazo de mantemento do investimento co fin de que a vinculación coa empresa sexa máis duradeira, e rebáixase a porcentaxe de dedución do 20% ao 15%, que se aplicará en catro anos co fin de mitigar o impacto fiscal da medida como consecuencia do aumento dos seus posibles beneficiarios.

En canto ao Imposto sobre o Patrimonio, modifícase o mínimo exento como consecuencia entrada en vigor do Real Decreto-lei 13/2011, do 16 de setembro, polo que se restablece o Imposto sobre o Patrimonio, con carácter temporal, equiparándoo a normativa estatal.

Polo que respecta ao Imposto sobre Transmisións Patrimoniais e Actos Xurídicos Documentados, asimílanse os créditos hipotecarios aos préstamos hipotecarios nos beneficios fiscais que afectan a estes últimos, tanto nos beneficios propios da comunidade autónoma, coma nos estatais, sempre que os créditos vaian destinados á adquisición de vivenda habitual. Convértese en indefinida a dedución na modalidade de actos xurídicos documentados para a constitución de préstamos hipotecarios destinados á cancelación doutros préstamos que foron destinados á adquisición de vivenda. Introdúcese un novo beneficio fiscal (dedución do 100% en actos xurídicos documentados) para os créditos e os préstamos hipotecarios cando se modifique o sistema de amortización ou calquera outra condición financeira do préstamo ou crédito.

No que respecta aos tributos sobre o xogo, revísase a normativa autonómica co obxecto de adaptala aos novos tipos de xogos autorizados en Galicia, como por exemplo, o bingo electrónico -ou que está previsto autorizar (proxecto de modificación das disposicións sobre máquinas na lei galega do xogo, proxecto de regulamentación do xogo das apostas)- e á nova normativa estatal en materia de xogo (onde se crea o imposto sobre as actividades de xogo).

Deste xeito, pode destacarse o seguinte: Modifícase a tributación das apostas, a semellanza da normativa estatal. Adáptase a tributación actual sobre máquinas e bingo, fixando a tributación para os novos tipos de máquinas e para o bingo electrónico. Establécense regras especiais para a tributación dos xogos cando se desenvolvan en todo ou en parte mediante servizos de comunicación sobretarifados ou con tarificación adicional, a semellanza da normativa estatal.

Noutro orde, establécense tamén medidas procedimentais e obrigas formais. Como principais cumpre sinalar: Introdúcese unha nova obriga formal ás entidades que realicen poxas de bens mobles para que informen das transaccións realizadas, os seus intervenientes e os importes destas, coa finalidade de facilitar o control fiscal desas transmisións.

Con esta finalidade e o compromiso adoptado da loita contra o fraude, establécense as obrigas de presentar declaracións informativas en materia de xogo, por un lado, para os notarios, ante os que deben depositarse as bases dos sorteos, concursos e calquera outro xogo e, por outra banda, para outros axentes de mercado, colaboradores necesarios na organización dos xogos a través de servizos de comunicación con tarificación adicional e a través doutros medios de comunicación remota (Internet).

Polo que se refire ás taxas administrativas, as modificacións introducidas na Lei 6/2003 de taxas e prezos obedecen, ben á creación de novas taxas ou ben á modificación das vixentes. Polo seu impacto económico destacan:

- En materia de infraestruturas aplicarase a taxa por ocupación, uso privativo ou aproveitamento especial do dominio público da Comunidade Autónoma aos supostos do dominio público viario cunha recadación prevista de 1.932.628,17 €.
- En materia de augas, en primeiro lugar, aplicarase a tarifa por dirección de contratos de servizo con unha previsión de 488.215 € de recadación. Ademais, establécese a tarifa aplicable aos beneficiarios das obras hidráulicas de regulación xestionadas pola administración hidráulica da Comunidade Autónoma de Galicia, cuns ingresos esperados de 1.804.446 €.

Polo que respecta ao canon da auga e coeficiente de vertedura, realízanse, entre outras, as seguintes modificacións: Considérase a exención para os suxeitos que se encontren en réxime de exclusión social. Dáse o mesmo tratamento ao coeficiente de verteduras en canto á aplicación dos supostos de non suxeición e exencións. Modifícase o tipo de gravame variable aplicable na acuicultura coa súa vinculación á produción e non ao volume captado ou vertido. Establécese como substituto do contribuínte, no caso de captacións propias deste, á empresa que presta o servizo de sumidoiro. Establécese un réxime transitorio para reducir o impacto da aplicación do coeficiente de vertedura cando as instalacións de depuración estean xestionadas por Augas de Galicia. Por último, equipárase o réxime de anulacións e baixa de liquidacións tributarias previsto na Lei de Augas ao establecido, con carácter xeral, no Texto refundido da Lei de réxime financeiro e orzamentario de Galicia.

Polo que concirne ás medidas administrativas contempladas no título segundo, cumpre destacar:

No relativo ao réxime orzamentario, procédese á adaptación do Texto refundido da Lei de réxime financeiro e orzamentario de Galicia ao previsto na Lei 16/2010, do 17 de decembro, de organización e funcionamento da Administración xeral e do sector público autonómico de Galicia, establecendo expresamente as obrigas orzamentarias de cada tipo de entidade do sector público galego, a información plurianual que teñen que conter os seus estados, o seu contido e prazo de remisión, así como o réxime das modificacións orzamentarias e as cláusulas que deben conter os convenios co sector público autonómico.

Por outra parte, en materia de subvencións, realízanse diversas modificacións de ca-

rácter non substantivo, dirixidas a adecuar o ámbito subxectivo da lei de subvencións ao previsto na Lei 16/2010, do 17 de decembro, de organización e funcionamento da Administración xeral e do sector público autonómico de Galicia, establecer unha remisión de carácter xeral á lei de contratos do sector público e trasladar ao articulado da lei, co obxecto de darlle carácter permanente, un precepto que, recorrentemente, se incluía nas últimas leis de presupostos.

No que respecta ás competencias administrativas en materia de xogo, o capítulo III do Título II realiza diversas modificacións da nosa lei reguladora ao obxecto de establecer o requisito de autorización da comunidade para a instalación e apertura de locais ou terminais para a realización de xogos de ámbito estatal. Actualizar o concepto de xogo integrando nel os que se realicen por medios electrónicos, informáticos ou telemáticos. Autorizar en locais de hostalaría a instalación de terminais de xogo distintos das máquinas recreativas, deixando as condicións ao que se determine regulamentariamente. Establecemento de autorización administrativa previa para a publicidade do xogo. Nova clasificación das máquinas recreativas, incorporando novas categorías e remitindo a Decreto a posibilidade de incorporar novos tipos de máquinas. Modificar o concepto de xogo do bingo, realizado tradicionalmente de forma presencial, para dar cabida a modalidades do xogo que poidan utilizar outras canles de explotación distintas do presencial.

O capítulo IV do Título II, dedicado ao medio ambiente, contén dúas modificacións legais dirixidas á racionalización dos procedementos de avaliación ambiental. En primeiro lugar, para matizar o procedemento de avaliación ambiental aplicable aos instrumentos de ordenación do territorio. En segundo lugar, para modificar a tipoloxía dos procedementos de avaliación ambiental.

No ámbito da ordenación farmacéutica modifícanse varios preceptos da Lei 5/1999, ao obxecto de fixar a obriga dun establecemento propio de farmacia naqueles centros hospitalarios, de asistencia social e psiquiátricos que teñan 100 ou máis camas, na liña do establecido noutras comunidades autónomas. Na norma galega estaba establecido en 50 camas. Ademais, a aplicación da medida relativa ao depósito de fármacos permitirá obter aforro económico para o Sergas, como consecuencia de que os medicamentos adquiridos polo servizo de farmacia do centro hospitalario teñen un menor custo que os adquiridos a través de receita oficial e despachados en oficinas de farmacia, posto que non levan a marxe de distribución.

Ademais, no mesmo ámbito, modifícase o precepto relativo aos horarios e servizos de garda das farmacias, ao obxecto de que as existentes en zonas rurais gocen dun réxime distinto previa autorización das unidades responsables da Consellería de Sanidade. Por último, adáptase o réxime sancionador á normativa estatal.

No que atinxe ás competencias en materia de saúde, incorpórase na Lei de Saúde, un novo apartado no precepto relativo aos titulares do dereito á protección da saúde e

á atención sanitaria, de maneira que se precisan os criterios que determinan o concepto de residencia en Galicia, aproximándoos ao concepto de residencia habitual da normativa tributaria, ao obxecto de evitar a fraude na declaración sobre o Estado membro onde reside o usuario dos servizos.

Dentro das disposicións derogatorias, destaca, a derogación da lei autonómica de protección contra a contaminación acústica de 1997, ao obxecto de evitar os resultados diverxentes e mesmo incompatibles da súa aplicación respecto á normativa estatal básica desenvolvida a partir da lei 37/2003. Esta derogación acompáñase co compromiso de que nun ano se aprobe un Decreto en Galicia que adapte a normativa e estableza as normas adicionais oportunas.

Tamén se derroga o procedemento de avaliación de efectos ambientais que foi esbozado nos artigos 10 a 12 da Lei 1/1995 sen contido material posto que a normativa xa prevé a posibilidade de someter a avaliación de impacto ambiental proxectos que non o estean, segundo a normativa básica estatal, de conformidade co previsto no Anexo II, Grupo 9, letra n), do vixente Texto refundido da Lei de avaliación ambiental de proxectos aprobado por RD 1/2008, de 11 de xaneiro. Tamén, derrógase un precepto da lei de medidas do 2002 para adecuar ao disposto na Lei 2/2011, de economía sostible, o desempeño das funcións do profesorado de ensino secundario e o profesorado técnico de formación profesional.

Por último, para garantir, no que atinxe ao persoal, unha homoxeneidade no proceso de adecuación das entidades instrumentais en materia de augas a que se refire a disposición derradeira terceira desta lei, resulta necesario introducir unha disposición derogatoria de parte da regulación que ao respecto realiza a Lei 9/2010, do 4 de novembro, de augas de Galicia.

Na disposición transitoria régúlase a continuación ata a súa finalización dos procedementos de avaliación de efectos ambientais que se estean tramitando á entrada en vigor desta lei.

Nas disposicións derradeiras, cumpre destacar a creación de subescalas dentro das escalas de seguridade e saúde no traballo ao obxecto de recoller as singularidades que presentan en canto a titulación as distintas disciplinas preventivas.

Ademais, modifícase, dentro destas disposicións derradeiras, a lei 8/2009, de 22 de decembro, pola que se regula o aproveitamento eólico en Galicia e se crean o canon eólico e o Fondo de Compensación Ambiental, de xeito que, por unha parte, ampliáanse as actuacións de protección do medio ambiente as que pode destinarse o Fondo de Compensación Ambiental. Por outra parte, permítese que a Comisión de seguimento de execución dos proxectos de desenvolvemento industrial tamén poida coñecer o estado de execución dos demais criterios de selección vinculados aos parques eólicos adxudicados.

Tamén, incorpórase ao texto da lei eólica unha nova disposición transitoria que permite a suspensión da tramitación dos procedementos de autorización de parques eólicos dende o anuncio de exposición pública da proposta de ampliación do ámbito da Rede Natura 2000.

Por último, modifícase a Disposición adicional sétima da Lei 16/2010, do 17 de decembro, de organización e funcionamento da administración xeral e do sector público autonómico de Galicia co obxecto de posibilitar que as entidades públicas empresariais suxeiten a súa actividade contractual á lexislación de contratos do sector público como administración pública, cando así se dispoña nunha norma con rango de Lei, en atención ás características da entidade, da súa actividade ou en atención aos fins institucionais de carácter público que a súa actividade contractual persiga. Igualmente, modifícase a Disposición transitoria terceira desta Lei, en aras a dotar de maior seguridade xurídica ao proceso de adecuación da regulación das entidades instrumentais, creadas con anterioridade a súa entrada en vigor, ás determinacións contidas no título III da mencionada norma.

Na elaboración desta lei solicitáronse os ditames do Consello Galego da Competencia e do Consello Económico e Social de Galicia.



TÍTULO I: MEDIDAS FISCAIS

II. TÍTULO I: MEDIDAS FISCAIS

CAPÍTULO I *Tributos cedidos*

Artigo 1º.- *Imposto sobre a renda das persoas físicas.*

Modifícase o apartado once do artigo 5 do Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto lexislativo 1/2011, do 28 de xullo, que queda redactado como segue:

“Once. Dedución por investimento en accións de entidades que cotizan no segmento de empresas en expansión do Mercado Alternativo Bursátil.

1.- Os contribuíntes poderán deducir na cota íntegra autonómica, e cun límite de 4.000 euros, o 15% das cantidades investidas durante o exercicio na adquisición de accións como consecuencia de acordos de ampliación de capital subscritos por medio do segmento de empresas en expansión do Mercado Alternativo Bursátil, aprobado por acordo do Consello de Ministros do 30 de decembro de 2005.

A dedución total calculada conforme ao parágrafo anterior ratearase por partes iguais no exercicio no que se realice o investimento e nos tres exercicios seguintes.

2.- Para poder aplicar a dedución á que se refire o apartado 1 deben cumprirse os seguintes requisitos:

a) A participación conseguida polo contribuínte na sociedade obxecto do investimento non pode ser superior ao 10% do seu capital social.

b) As accións adquiridas deben manterse no patrimonio do contribuínte durante un período de tres anos, como mínimo.

c) A sociedade obxecto do investimento debe ter o domicilio social e fiscal en Galicia, e non debe ter como actividade principal a xestión dun patrimonio mobiliario ou inmobiliario, de acordo co disposto polo artigo 4º.8.Dos.a) da Lei 19/1991, do 6 de xuño, do imposto sobre o patrimonio.

Os requisitos indicados nas letras a) e c) anteriores deberán cumprirse durante todo o prazo de mantemento indicado na letra b), contado dende a data de adquisición da participación.

d) As operacións nas que sexa aplicable a dedución deben formalizarse en escritura pública, na que se debe especificar a identidade dos investidores e o importe do investimento respectivo.

3.- O incumprimento dos requisitos anteriores comporta a perda do beneficio fiscal, e o contribuínte debe incluír na declaración do imposto correspondente ao exercicio no que se produciu o incumprimento a parte do imposto que se deixou de pagar como consecuencia da aplicación da dedución practicada, xunto cos xuros de demora percibidos.

4.- A dedución contida neste artigo resultará incompatible, para os mesmos investimentos, coa dedución por investimento na adquisición de accións ou participacións sociais en entidades novas ou de recente creación."

Artigo 2º.- *Imposto sobre o patrimonio.*

Modifícase o artigo 13 do Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto lexislativo 1/2011, do 28 de xullo, que queda redactado como segue:

"Artigo 13. Mínimo exento.

O mínimo exento no Imposto sobre o Patrimonio establécese en 700.000 euros."

Artigo 3º.- *Imposto sobre transmisións patrimoniais e actos xurídicos documentados.*

Un.- Modifícase o apartado dous do artigo 15 do Texto Refundido das disposicións legais da Comunidade Autónoma de Galicia en materia de tributos cedidos polo Estado aprobado polo Decreto lexislativo 1/2011, do 28 de xullo, que queda redactado como segue:

"Dous. Tipo de gravame aplicable na primeira adquisición de vivenda habitual.

Nas primeiras copias de escrituras que documenten a primeira adquisición de vivenda habitual ou a constitución de préstamos ou créditos hipotecarios destinados ao seu financiamento, suxeitas ao imposto sobre actos xurídicos documentados, na súa modalidade de documentos notariais, o tipo de gravame aplicable será do 0,75%."

Dous.- Modifícase o apartado cinco do artigo 17 do Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto lexislativo 1/2011, do 28 de xullo, que queda redactado como segue:

"Cinco. Dedución para a constitución de préstamos ou créditos hipotecarios destinados á cancelación doutros préstamos ou créditos hipotecarios que foron destinados á adquisición de vivenda habitual.

1.- No imposto sobre actos xurídicos documentados, na súa modalidade de documentos notariais, aplicarase unha dedución do 100% da cota, sempre que se cumpran os requisitos seguintes:

a) Que a operación se refira á constitución dun préstamo ou crédito hipotecario.

b) Que a finalidade do préstamo ou crédito sexa a cancelación doutro préstamo ou crédito hipotecario destinado ao financiamento da adquisición dunha vivenda habitual.

2.- No caso de que o novo préstamo ou crédito hipotecario sexa dunha contía superior á necesaria para a cancelación total do préstamo anterior, a porcentaxe de dedución aplicarase exclusivamente sobre a porción de cota que resulte de aplicarlle a este o resultado do cociente entre o principal pendente de cancelación e o principal do novo préstamo ou crédito."

Tres.- Engádese un novo apartado seis ao artigo 17 do Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto lexislativo 1/2011, do 28 de xullo, co seguinte contido:

"Seis. Dedución nas operacións de subrogación e modificación de préstamos e créditos hipotecarios concedidos para o investimento en vivenda habitual.

1.- Aplicarase unha dedución do 100% na cota do imposto sobre actos xurídicos documentados na modalidade de documentos notariais, ás escrituras de créditos hipotecarios que recollan as operacións a que se refiren os artigos 7 e 9 da Lei 2/1994, do 30 de marzo, sobre Subrogación e Modificación de Préstamos Hipotecarios e sempre que se trate de créditos concedidos para o investimento en vivenda habitual. Este beneficio fiscal aplicarase nos mesmos termos e condicións que os recoñecidos para os préstamos hipotecarios nos devanditos artigos.

2.- Aplicarase unha dedución do 100% na cota do imposto sobre actos xurídicos documentados na modalidade gradual de Actos Xurídicos Documentados, ás escrituras públicas de novación modificativa de préstamos ou créditos hipotecarios concedidos para o investimento en vivenda habitual, pactados de común acordo entre acredor e debedor, sempre que o acredor sexa unha das entidades a que se refire o artigo 1 da Lei 2/1994, do 30 de marzo, sobre Subrogación e Modificación de Préstamos Hipotecarios e a modificación se refira ao método ou sistema de amortización e calquera outras condicións financeiras do préstamo ou crédito."

Artigo 4º.- Taxa fiscal sobre o xogo.

Un.- Modifícase o artigo 19 do Texto Refundido das disposicións legais da Comuni-

dade Autónoma de Galicia en materia de tributos cedidos polo Estado, aprobado polo Decreto legislativo 1/2011, do 28 de xullo, quedando redactado como segue:

“Artigo 19. Taxa sobre rifas, tómbolas, apostas e combinacións aleatorias

Un. Exencións.

Quedan exentos do pagamento destas taxas:

1.- As rifas organizadas ou celebradas sen ánimo de lucro con motivo de acontecementos educativos, sociais ou festivos, sempre que o produto íntegro da venda dos billetes ofrecidos non supere os 12.000 euros e o premio ofrecido teña un valor inferior a 1.500 euros.

2.- A celebración de sorteos, tómbolas e rifas que organice a Cruz Vermella, nas condicións que regulamentariamente se determinen.

3.- Os sorteos de amortización e capitalización que estean legalmente autorizados.

4.- A celebración de tómbolas diocesanas de caridade, nas condicións que regulamentariamente se determinen.

Dous. Base imponible.

Con carácter xeral, a base imponible virá constituída polo importe total das cantidades que os xogadores ou xogadoras dediquen á súa participación nos xogos. Establécense as seguintes regras especiais:

a) Nas rifas e tómbolas a base imponible virá constituída polo importe total dos boletos ou billetes ofrecidos.

b) Nas combinacións aleatorias a base imponible virá constituída polo valor dos premios ofrecidos. Para estes efectos entenderase por valor dos premios, o valor de mercado dos premios incluíndo así mesmo a suma de tódolos gastos necesarios para a posta a disposición do premio.

c) Nas apostas a base imponible poderá vir constituída:

c.1) polo importe total dos billetes, boletos ou resgardos de participación vendidos, sexa calquera o medio a través do que se realizaran.

c.2) pola diferenza entre a suma total das cantidades apostadas e o importe dos premios obtidos polos participantes no xogo.

d) Cando a participación en calquera dos xogos gravados por este tributo se realice,

na súa totalidade ou en parte, mediante servizos de telecomunicación sobretarifados ou con tarificación adicional, a base imponible virá determinada polo valor dos premios ofrecidos, incluíndo así mesmo a suma de tódolos gastos necesarios para a organización, celebración e realización do xogo, para a posta a disposición do premio, e máis os importes percibidos correspondentes á sobretarifación da participación no xogo, excluído o imposto indirecto sobre o valor engadido ou calquera outro imposto indirecto deste carácter que grave as operacións realizadas.

Para a determinación das bases poderán ser empregadas as réximes de estimación directa ou estimación obxectiva, reguladas na lei xeral tributaria. Poderá igualmente determinarse, mediante convenios, servindo en todo caso como signos, índices ou módulos o número e valor dos billetes, boletos ou resgardos de participación, sexa calquera o medio a través do que se expediran ou emitiran, o importe dos premios e as bases de poboación. Nos supostos de participación a través de medios técnicos, telemáticos, interactivos, ou de forma remota, estes medios deberán conter o procedemento ou os elementos de control necesarios que garantan a exactitude na determinación da base imponible. Para estes efectos, o suxeito pasivo deberá dispoñer dun sistema informático que permita á administración tributaria o control telemático da xestión e o pagamento do tributo correspondente."

Tres. Tarifas.

I. Rifas e tómbolas.

a) As rifas e tómbolas tributarán con carácter xeral ao 10% do importe total dos boletos ou billetes ofrecidos.

b) Nas tómbolas de duración inferior a quince días organizadas con ocasión de mercados, feiras ou festas de ámbito local e sempre que os seus premios non excedan dun valor total de 3.000 euros o suxeito pasivo poderá optar entre satisfacer a taxa conforme ao tipo sinalado na letra a) anterior ou ben a razón de 300 euros por cada día de duración en capitais de provincia ou poboacións con máis de 75.000 habitantes, 210 euros en poboacións entre 15.000 e 75.000 habitantes e 90 euros por cada día de duración en poboacións inferiores a 15.000 habitantes.

2. Apostas.

Nas apostas, o tipo será con carácter xeral dun 8,5%, aplicable á base imponible establecida na letra c.1) do apartado Dous anterior. O tipo para as apostas deportivas ou de competición será dun 10%, aplicable á base imponible establecida na letra c.2) do apartado Dous anterior."

3. Combinacións aleatorias.

Nas combinacións aleatorias, o tipo será do 12% do valor dos premios ofrecidos.

4. Participación en xogos mediante servizos de telecomunicación sobretarifados ou con tarificación adicional.

O tipo de gravame para calquera dos xogos gravados por este tributo nos que se participe, na súa totalidade ou en parte, mediante servizos de telecomunicación sobretarifados ou con tarificación adicional será do 12% aplicable á base imponible establecida na letra d) do apartado Dous anterior.

Catro. Devengo.

A taxa sobre rifas, tómbolas, apostas e combinacións aleatorias, cando o seu rendemento lle corresponda á Comunidade Autónoma de Galicia, devengarase:

a) Nas rifas, tómbolas e combinacións aleatorias, ao concederse a autorización necesaria para a súa celebración. En defecto de autorización, devengarase cando se celebren, sen prexuízo das responsabilidades doutra orde que procedesen.

b) Nas combinacións aleatorias que non precisen autorización e nas apostas, no momento en que se organicen ou se inicie a súa celebración. "

Dous.- Modifícase o artigo 20 do Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto lexislativo 1/2011, do 28 de xullo, que queda redactado como segue:

"Artigo 20. Taxa sobre xogos de sorte, envite ou azar.

Un. Exencións.

Quedan exentos do pagamento da taxa fiscal sobre xogos de sorte, envite ou azar os xogos excluídos do ámbito de aplicación da Lei reguladora do xogo de Galicia.

Dous. Base imponible.

A base imponible da taxa será a seguinte:

No caso do xogo en casinos ou do xogo da lotaría instantánea electrónica, virá constituída polos ingresos brutos que sexan obtidos polos suxeitos pasivos. Entenderase por ingresos brutos a diferenza entre o importe total dos ingresos obtidos procedentes do xogo e as cantidades satisfeitas aos xogadores ou xogadoras polas súas ganancias.

No xogo do bingo a base imponible virá constituída pola suma total do satisfeito polos xogadores ou xogadoras pola adquisición dos cartóns ou valor facial destes.

Na modalidade de bingo electrónico, a base imponible virá constituída polo importe anterior, descontada a parte destinada a premios.

Nos xogos e concursos difundidos mediante radio ou televisión e nos que a súa participación se realice, na súa totalidade ou en parte, mediante servizos de telecomunicación sobretarifados ou con tarificación adicional, a base imponible virá determinada pola suma do valor dos premios e máis as cantidades correspondentes á sobretarifación da participación no xogo.

No resto de supostos a base imponible virá constituída polas cantidades que os xogadores ou xogadoras dediquen á súa participación nos xogos que se celebren nos distintos locais, instalacións ou recintos onde se realicen xogos de sorte, envite ou azar.

A base imponible determinarase con carácter xeral por estimación directa. Nos supostos do bingo electrónico e dos xogos desenvolvidos a través de Internet, por medios técnicos, telemáticos, interactivos ou dunha forma remota, estes medios deberán conter o procedemento ou os elementos de control necesarios que garantan a exactitude na determinación da base imponible. Para estes efectos, o suxeito pasivo deberá dispoñer dun sistema informático que permita á administración tributaria o control telemático da xestión e o pagamento do tributo correspondente.

A base imponible poderá determinarse mediante estimación obxectiva mediante a aplicación das magnitudes, índices, módulos ou datos previstos regulamentariamente.

Tres. Tipos de gravame e cotas fixas.

1. Tipo xeral.

O tipo de gravame xeral será do 20%.

2. Casinos de xogo.

Nos casinos de xogo aplicarase a seguinte tarifa:

Porción de base imponible comprendida entre euros	Tipo aplicable porcentaxe
Entre 0 e 1.677.207	22
Entre 1.677.207,01 e 2.775.016	38
Entre 2.775.016,01 e 5.534.788	49
Máis de 5.534.788	60

3. Máquinas ou aparellos automáticos.

Nos casos de explotación de máquinas ou aparellos automáticos aptos para a reali-

zación dos xogos, a cota determinarase en función da clasificación das máquinas, realizada pola Lei 14/1985, de 23 de outubro, reguladora dos xogos e apostas en Galicia, segundo as normas seguintes:

A.- Máquinas tipo «A» especial: a contía a pagar por este tipo de máquinas será a que resulte de multiplicar por 0,75 as contías sinaladas na letra B seguinte para as máquinas tipo “B” segundo proceda consonte coas súas características.

B.- Máquinas tipo «B» ou recreativas con premio:

a) Cota anual: 3.740 euros.

b) Cando se trate de máquinas ou aparellos automáticos tipo «B», nos que poidan intervir dous ou máis xogadores ou xogadoras de forma simultánea e sempre que o xogo de cada un deles sexa independente do realizado por outros, serán de aplicación as seguintes cotas:

1º.- Máquinas ou aparellos de dous xogadores ou xogadoras: dúas cotas, de acordo co previsto na letra a).

2º.- Máquinas ou aparellos de tres ou máis xogadores ou xogadoras: 7.640 euros, máis o resultado de multiplicar por 3.080 o produto do número de xogadores ou xogadoras polo prezo máximo regulamentario da partida.

c) No caso de homologación dunha máquina de tipo «B» cun prezo máximo de partida superior ao prezo máximo regulamentario de 0,20 euros, as cotas tributarias establecidas nas letras a) e b) anteriores incrementaranse en 18,80 euros por cada céntimo de euro no que se incremente o prezo máximo regulamentario.

d) No caso de modificación do prezo máximo regulamentario de 0,20 euros para a partida en máquinas de tipo «B» ou recreativas con premio, a cota tributaria anual correspondente incrementarase en 18,80 euros por cada céntimo de euro de diferenza entre os prezos máximos regulamentarios ou, no seu caso, entre o novo prezo máximo regulamentario e o prezo máximo de partida homologado.

C.- Máquinas tipo “B especial”: a contía a pagar por este tipo de máquinas será a que resulte de incrementar nun 25% as contías sinaladas na letra B anterior para as máquinas tipo “B” segundo proceda consonte coas súas características.

D.- Máquinas tipo «C» ou de azar: Cota anual: 5.460 euros.

E.- Calquera outro tipo de máquina, apta para un único xogador ou xogadora: cota anual: 6.000 euros. Esta tarifa incrementarase en 4.000 € por cada xogador ou xogadora de máis.

4. Bingo.

Nas modalidades do xogo do bingo diferentes ao bingo electrónico, aplicarase o tipo de gravame do 20%.

Na modalidade do bingo electrónico, aplicarase o tipo de gravame do 30%.

O suxeito pasivo que non reduza o cadro de persoal medio da sala de bingo durante o exercicio de 2012 poderá acollerse ao tipo reducido do 25% na modalidade do bingo electrónico.

Para o cálculo do cadro de persoal medio total da sala tomaranse as persoas empregadas, nos termos que dispoña a lexislación laboral, tendo en conta a xornada contratada en relación coa xornada completa.

O incumprimento do requisito anterior leva a perda do beneficio fiscal, e o suxeito pasivo debera practicar liquidación complementaria das cantidades non ingresadas por aplicación do tipo reducido xunto cos correspondentes intereses de demora no mes de xaneiro do ano 2013.

Catro. Devengo e período impositivo.

O devengo producirase con carácter xeral, pola autorización, e, no seu defecto, pola organización e/ou pola celebración do xogo. Para aquelas autorizacións que permitan o desenvolvemento do xogo dun xeito continuado ao longo do tempo, o primeiro ano o devengo coincidirá coa data da autorización e os anos subseguintes co 1 de xaneiro de cada ano natural. Nestes casos o período impositivo coincidirá co ano natural.

No xogo do bingo o devengo producirase no momento de subministro dos cartóns de xogo ao suxeito pasivo. Na modalidade do bingo electrónico o devengo producirase consonte o disposto no parágrafo anterior.

Cando se trate de máquinas ou aparellos automáticos as cotas serán exixibles por anos naturais, producíndose o devengo o 1 de xaneiro de cada ano natural para as autorizadas en anos anteriores e na data da autorización para as novas autorizacións."

Artigo 5º.- *Obrigas formais e normas procedimentais.*

Un.- Modifícase o artigo 21 do Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto lexislativo 1/2011, do 28 de xullo, quedando redactado como segue:

"Artigo 21. Presentación de declaracións.

1.- Sen prexuízo de que a persoa titular da consellería competente en materia de facenda autorice o seu ingreso en entidades colaboradoras, as declaracións ou declaracións-liquidacións deberán presentarse directamente nos servizos de xestión tributaria das xefaturas territoriais da consellería competente en materia de facenda ou nas oficinas liquidadoras de distrito hipotecario que, a cargo de rexistradores da propiedade, teñen encomendadas todas ou algunhas das funcións relativas á aplicación destes impostos.

2.- O titular da consellería competente en materia de facenda poderá autorizar a presentación das citadas declaracións ou declaracións-liquidacións por vía telemática, así como celebrar acordos con outras administracións públicas, así como coas entidades, institucións e organismos a que se refire o artigo 92 da Lei 58/2003, do 17 de decembro, Xeral Tributaria, para facer efectiva a colaboración social na presentación e ingreso das citadas declaracións ou declaracións-liquidacións mediante a utilización das técnicas e medios electrónicos, informáticos e telemáticos. Mediante orde determinaranse os supostos e condicións nos que os obrigados tributarios deberán presentar por medios telemáticos as súas declaracións, declaracións-liquidacións ou calquera outro documento con transcendencia tributaria.

3.- Ao obxecto de facilitar o cumprimento das obrigas tributarias dos contribuíntes a consellería competente en materia de facenda, no ámbito das súas competencias, facilitará e impulsará a presentación telemática das escrituras públicas, desenvolvendo os instrumentos xurídicos, técnicas e medios electrónicos, informáticos e telemáticos necesarios para tal fin.

4.- As declaracións ou declaracións-liquidacións presentaranse nos prazos e forma que se determine mediante orde da consellería competente en materia de facenda.”

Dous.- Modifícase o artigo 30 do Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto lexislativo 1/2011, do 28 de xullo, quedando redactado como segue:

“Artigo 30. Liquidación e pagamento da taxa fiscal sobre rifas, tómbolas, apostas e combinacións aleatorias.

Os suxeitos pasivos deberán presentar declaración dos feitos no prazo dun mes, contado desde o momento do devengo, na forma e ante o órgano da Administración tributaria, determinados regulamentariamente.

A consellería competente en materia de facenda aprobará, de ser o caso, os modelos mediante os que os suxeitos pasivos deberán declarar, autoliquidar e ingresar o importe correspondente na forma, lugar e prazos que determine regulamentariamente. A consellería competente en materia de facenda poderá dispoñer que as declaracións e/ou autoliquidacións do tributo se efectúen mediante os programas informáticos de axuda que, de ser o caso, se aproben. Así mesmo, poderá dispoñer a obrigatoriedade da súa presentación e

o pagamento mediante medios telemáticos.”

Tres.- Modifícase o artigo 31 do Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto lexislativo 1/2011, do 28 de xullo, quedando redactado como segue:

“Artigo 31. Liquidación e pagamento da taxa fiscal sobre xogos de sorte, envite ou azar.

Un.- Máquinas.

1.- Os suxeitos pasivos deberán presentar, na forma, lugar e prazo determinados por orde da consellería competente en materia de facenda, unha declaración por cada máquina en explotación, e deberán autoliquidar e ingresar a cota anual legalmente establecida que corresponda á tipoloxía e ás características da autorización da máquina.

Nos casos de nova autorización ou de reinicio da explotación da máquina con autorización de explotación en situación de suspensión provisional na data do devengo a cota que deberán autoliquidar os suxeitos pasivos será:

a) O 75% da cota anual, se a autorización ou o alta da autorización é posterior ao 31 de marzo do ano en curso.

b) O 50% da cota anual, se a autorización ou o alta da autorización é posterior ao 30 de xuño do ano en curso.

c) O 25% da cota anual, se a autorización ou o alta da autorización é posterior ao 30 de setembro do ano en curso.

2.- Malia o disposto no número 1 anterior, os suxeitos pasivos poderán optar, no momento de formular a autoliquidación, polo fraccionamento do importe que se deba ingresar, en pagamentos fraccionados trimestrais iguais, e deberán ingresar os pagamentos trimestrais que estivesen vencidos no momento de presentar a autoliquidación, así como aprazar o ingreso dos restantes nos períodos de ingreso predeterminados por orde da consellería competente en materia de facenda.

A opción polo fraccionamento e aprazamento sinalados no parágrafo anterior non precisará de achega e/ou constitución de garantía ningunha nin devengará xuros de mora. Serán requisitos para poder exercer a opción anterior:

a) Autoliquidar a cota anual vixente.

b) Presentar a autoliquidación no prazo regulamentariamente establecido por orde da consellería competente en materia de facenda.

c) Domiciliar os pagamentos fraccionados aprazados.

Non será posible aprazar ou fraccionar os pagamentos fraccionados trimestrais. A presentación da solicitude non impedirá o inicio do período executivo nin o devengo das recargas correspondentes e dos xuros de mora, e considerarase incumprimento das obrigacións tributarias para todos os efectos. O incumprimento do pagamento de calquera pagamento fraccionado terá os efectos sinalados na normativa xeral tributaria.

3.- Nos casos nos que para unha máquina en explotación se modifícase algunha ou varias das características da súa autorización que supuxesen modificación da cota anual, con data de efectos posterior ao peche do prazo de presentación da autoliquidación á que se refire o número 1 deste apartado Un, o suxeito pasivo deberá presentar, na forma, lugar e prazo determinados por orde da consellería competente en materia de facenda, unha declaración complementaria coa autoliquidación e o ingreso do importe total da diferenza entre a nova cota anual e a xa autoliquidada.

Para calcular a cota anual segundo as novas características da autorización de explotación da máquina terase en conta a data de efectos, do xeito que especifique a orde da consellería competente en materia de facenda.

Os suxeitos pasivos poderán optar polo fraccionamento e aprazamento aos que se refire o número 2 anterior cos mesmos requisitos, obrigacións e formalidades.

4.- Cando un suxeito pasivo reinicie a explotación da máquina no segundo ou no terceiro trimestre do ano en curso coa intención de explotala como máximo ata o fin do terceiro trimestre deberá presentar, na forma, no lugar e prazo determinados por orde da consellería competente en materia de facenda, unha declaración complementaria coa autoliquidación e o ingreso:

a) Do 50% da cota anual, se o reinicio da explotación ten efectos para o segundo e o terceiro trimestre.

b) Do 25% da cota anual, se o reinicio da explotación ten efectos para o segundo ou o terceiro trimestre.

Malia o disposto na letra a), os suxeitos pasivos poderán optar polo fraccionamento e aprazamento aos que se refire o número 2 anterior cos mesmos requisitos, obrigacións e formalidades, e tendo en conta que o número de pagamentos trimestrais será de dous.

Para poder acollerse a este réxime, deberán cumprirse os seguintes requisitos:

a) Que as máquinas se atopen na situación de suspensión provisional á data do 30 de setembro do ano anterior.

b) Que a autoliquidación na que se exerza a opción por este réxime se presente no prazo regulamentariamente establecido por orde da consellería competente en materia de facenda. Deberase sinalar o número de trimestres nos que se vai a manter a máquina en explotación.

Se o suxeito pasivo, unha vez exercida a opción por este réxime, decidise manter a máquina en explotación máis alá da data comprometida, deberá presentar, na forma, lugar e prazo determinados por orde da consellería competente en materia de facenda, unha declaración complementaria coa autoliquidación e o ingreso do importe total da diferenza entre a cota anual que procedese e a xa autoliquidada.

5.- A consellería competente en materia de facenda poderá dispoñer que as declaracións e/ou autoliquidacións do tributo se efectúen mediante os programas informáticos de axuda que, de ser o caso, se aproben. Así mesmo, poderá dispoñer a obrigatoriedade da súa presentación e o pagamento mediante medios telemáticos.

Dous. Casinos.

Os suxeitos pasivos deberán presentar, na forma, lugar e prazos determinados por orde da consellería competente en materia de facenda unha autoliquidación por cada casino para o que teñan autorización.

A consellería competente en materia de facenda poderá dispoñer que as declaracións e/ou autoliquidacións do tributo se efectúen mediante os programas informáticos de axuda que, de ser o caso, se aproben. Así mesmo, poderá dispoñer a obrigatoriedade da súa presentación e o pagamento mediante medios telemáticos.

Tres. Bingo.

Os suxeitos pasivos deberán presentar, na forma, lugar e prazo determinados por orde da consellería competente en materia de facenda declaración mediante a que se autoliquidará o importe do tributo que corresponda.

A consellería competente en materia de facenda poderá dispoñer que as declaracións e/ou autoliquidacións do tributo se efectúen mediante os programas informáticos de axuda que, de ser o caso, se aproben. Así mesmo, poderá dispoñer a obrigatoriedade da súa presentación e o pagamento mediante medios telemáticos.

Catro. Concursos e outros xogos de sorte envite ou azar.

Os suxeitos pasivos deberán presentar, na forma, lugar e prazo determinados por orde da consellería competente en materia de facenda declaración dos feitos impositivos mediante a que se autoliquide o importe do tributo que corresponda.

A consellería competente en materia de facenda poderá dispoñer que as declaracións e/ou autoliquidacións do tributo se efectúen mediante os programas informáticos de axuda que, de ser o caso, se aproben. Así mesmo, poderá dispoñer a obrigatoriedade da súa presentación e o pagamento mediante medios telemáticos."

Catro.- Modifícase o título do Capítulo II do Título III do Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto legislativo 1/2011, do 28 de xullo, quedando redactado como segue:

"CAPÍTULO II. OBRIGACIÓNS FORMAIS"

Cinco.- Modifícase o artigo 32 do Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto legislativo 1/2011, do 28 de xullo, quedando redactado como segue:

"Artigo 32.- Obrigacións formais dos notarios.

Un. O cumprimento das obrigacións formais dos notarios, recollidas no artigo 32.2 da Lei 29/1987, de 18 de decembro, do imposto sobre sucesións e doazóns, e no artigo 52 do Real Decreto legislativo 1/1993, de 24 de setembro, polo que se aproba o texto refundido da Lei do imposto sobre transmisións patrimoniais e actos xurídicos documentados, realizarase no formato e prazos que determine a consellería competente en materia de facenda. A remisión desa información poderá realizarse tamén mediante transmisión por vía telemática nas condicións e deseño que aprobe a devandita consellería.

Dous. Co fin de facilitar o cumprimento das obrigas tributarias dos contribuíntes e máis o acceso telemático dos documentos aos rexistros públicos, os notarios destinados na Comunidade Autónoma de Galicia, en colaboración co Consello Xeral do Notariado, remitiranlle por vía telemática á consellería competente en materia de facenda unha declaración informativa notarial comprensiva dos elementos básicos da escritura e confeccionada cos datos existentes no índice único informatizado notarial ao que se refire o artigo 17º da Lei, de 28 de maio de 1862, do notariado. A declaración informativa notarial ou ficha notarial deberá reproducir fielmente os elementos básicos da escritura, sobre todo aqueles que teñan relevancia para efectos tributarios, e o notario velará pola máis estrita veracidade da ficha, así como pola súa correspondencia cos documentos públicos autorizados e intervidos, e será responsable de calquera discrepancia que exista entre aquela e estes. Tamén deberán remitir, por solicitude da consellería competente en materia de facenda, copia electrónica destas fichas, de conformidade co disposto na lexislación notarial.

A ficha resumen notarial substituirá ao documento notarial nos supostos que determine por orde a consellería competente en materia de facenda, que, ademais, establecerá os procedementos, estrutura e os prazos nos que debe ser remitida a información.

Tres. Co fin de facilitar o debido control do cumprimento das obrigas tributarias dos suxeitos pasivos dos tributos sobre o xogo, os notarios destinados na Comunidade Autónoma de Galicia, en colaboración co Consello Xeral do Notariado, deberán remitir por vía telemática á consellería competente en materia de facenda unha declaración informativa notarial comprensiva dos elementos que teñan relevancia para efectos tributarios das bases de tódolos xogos, concursos ou sorteos que sexan depositadas ante eles e que teñan como ámbito territorial máximo a Comunidade Autónoma de Galicia, así como a resolución deles. O notario velará pola máis estrita veracidade da ficha, así como pola súa correspondencia coas bases e información/documentos públicos depositadas/depositados ante eles, e será responsable de calquera discrepancia que exista entre aquela e estas/estes. Tamén deberán remitir, por solicitude da consellería competente en materia de facenda, copia electrónica destas fichas, de conformidade co disposto na lexislación notarial.

A consellería competente en materia de facenda establecerá os procedementos, estrutura, formato, os prazos e as condicións nos que debe ser remitida a información."

Seis.- Engádese un novo artigo 34 ao Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto lexislativo 1/2011, do 28 de xullo, co seguinte contido:

"Artigo 34. Subministro de información polas entidades que realicen poxas de bens mobles.

As empresas que realicen poxas de bens mobles deberán remitir semestralmente unha declaración coa relación das transmisións de bens en que interviñesen, relativas ao semestre anterior. Esta relación deberá comprender os datos de identificación do transmitinte e o adquirente, a data da transmisión, unha descrición do ben poxado e o prezo final de adxudicación.

A consellería competente en materia de facenda determinará os modelos de declaración e prazos de presentación, o contido da información a remitir, así como as condicións nas que a presentación mediante soporte directamente lexible por ordenador ou mediante transmisión por vía telemática será obrigatoria. En ambos os dous casos, estas declaracións terán a consideración de tributarias para todos os efectos regulados na Lei Xeral Tributaria."

Sete.- Engádese un novo artigo 35 ao Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto lexislativo 1/2011, do 28 de xullo, co seguinte contido:

"Artigo 35. Obrigacións formais dos operadores que presten Servizos de Tarificación Adicional e dos operadores de rede de Servizos de Tarificación Adicional.

Co fin de facilitar o debido control do cumprimento das obrigas tributarias dos suxei-

tos pasivos dos tributos sobre o xogo, os operadores de Servizos de Tarificación Adicional e os operadores de rede de Servizos de Tarificación Adicional que presten estes servizos no ámbito territorial da Comunidade Autónoma de Galicia, deberán remitir por vía telemática á consellería competente en materia de facenda unha declaración informativa comprensiva dos elementos que teñan relevancia para efectos tributarios de cada un dos contratos realizados con titulares de números destinados a prestar servizos de ocio e entretemento que promovan xogos, concursos ou sorteos que teñan como ámbito territorial máximo a Comunidade Autónoma de Galicia.

A consellería competente en materia de facenda establecerá os procedementos, estrutura, formato, os prazos e as condicións nos que debe ser remitida a declaración informativa.”

Oito.- Engádese un novo artigo 36 no Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto legislativo 1/2011, do 28 de xullo, co seguinte contido:

“Artigo 36. Obrigacións formais dos operadores que presten servizos de comunicacións electrónicas.

Co fin de facilitar o debido control do cumprimento das obrigas tributarias dos suxeitos pasivos dos tributos sobre o xogo, os operadores que presten servizos de comunicacións electrónicas deberán remitir por vía telemática á consellería competente en materia de facenda unha declaración informativa comprensiva dos elementos que teñan relevancia para efectos tributarios de cada un dos contratos realizados con titulares de espazos web destinados a prestar servizos de ocio e entretemento que promovan xogos, concursos ou sorteos que teñan como ámbito territorial máximo a Comunidade Autónoma de Galicia.

A consellería competente en materia de facenda establecerá os procedementos, estrutura, formato, os prazos e as condicións nos que debe ser remitida a declaración informativa.”

Artigo 6º.- *Modificación das disposicións derradeiras do Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto legislativo 1/2011, do 28 de xullo.*

Un.- Modifícase a disposición derradeira primeira do Texto Refundido das disposicións legais da Comunidade Autónoma de Galicia en materia de tributos cedidos polo Estado aprobado polo do Decreto legislativo 1/2011, do 28 de xullo, quedando redactado como segue:

“Primeira. Habilitación normativa.

A Xunta de Galicia ditará cantas disposicións sexan necesarias para o desenvolvemento regulamentario do presente Texto Refundido, autorizándose á consellería competente en materia de facenda para aprobar as disposicións que sexan precisas para a súa aplicación"

Dous.- Modifícase a disposición derradeira segunda do Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto legislativo 1/2011, do 28 de xullo, quedando redactado como segue:

"Segunda. Leis de orzamentos.

As Leis de orzamentos xerais da Comunidade Autónoma de Galicia poderán modificar as disposicións contidas neste Texto Refundido."

Tres.- Modifícase a disposición derradeira terceira do Texto Refundido das disposicións legais da Comunidade Autónoma de Galicia en materia de tributos cedidos polo Estado, aprobado polo Decreto legislativo 1/2011, do 28 de xullo, quedando redactado como segue:

"Terceira. Vixencia temporal de determinados beneficios fiscais.

Os tipos de gravame previstos nas alíneas Tres, para o suposto descrito no seu epígrafe 1.b), cinco e seis do artigo 14, e nas alíneas Tres, para o suposto descrito no seu epígrafe 1.b), e seis do artigo 15, serán de aplicación ata o 31 de decembro de 2011. Este prazo poderá ser prorrogado polas leis de orzamentos xerais da comunidade autónoma."

CAPÍTULO II *Tributos propios*

Artigo 7º.- *Imposto sobre o bingo.*

Un.- Modifícase o artigo 3 da Lei 7/1991, do 19 de xuño, de tributación sobre o xogo, que queda redactado como segue:

"Artigo 3. Base imponible.

A base imponible virá constituída pola suma total do satisfeito polos xogadores ou xogadoras pola adquisición dos cartóns ou valor facial destes.

Na modalidade de bingo electrónico, a base imponible virá constituída polo importe anterior, descontada a parte destinada a premios."

Dous.- Modifícase o artigo 5 da Lei 7/1991, do 19 de xuño, de tributación sobre o

xogo, que queda redactado como segue:

“Artigo 5. Tipo de gravame.

Nas modalidades do xogo do bingo diferentes ao bingo electrónico, aplicarase o tipo de gravame do 5%.

Na modalidade do bingo electrónico, aplicarase o tipo de gravame do 7,5%.

O suxeito pasivo que non reduza o cadro de persoal medio da sala de bingo durante o exercicio de 2012 poderá acollerse ao tipo reducido do 5% na modalidade do bingo electrónico.

Para o cálculo do cadro de persoal medio total da sala tomaranse as persoas empregadas, nos termos que dispoña a lexislación laboral, tendo en conta a xornada contratada en relación coa xornada completa.

O incumprimento do requisito anterior leva a perda do beneficio fiscal, e o suxeito pasivo debera practicar liquidación complementaria das cantidades non ingresadas por aplicación do tipo reducido xunto cos correspondentes intereses de demora no mes de xaneiro do ano 2013.”

Artigo 8º.- *Taxas.*

Introdúcense as seguintes modificacións na Lei 6/2003, do 9 de decembro, de taxas, prezos e exaccións reguladoras da Comunidade Autónoma de Galicia, na súa redacción vixente:

1) Introdúcese un novo punto no artigo 26, coa redacción que se transcribe a seguir, sendo numerado como 3 e sendo reenumerado o actual punto 3 como 4:

“3. Os beneficiados polas obras de regulación dos recursos hídricos xestionadas pola Administración hidráulica da Comunidade Autónoma de Galicia e financiadas total ou parcialmente con cargo aos orzamentos da Comunidade Autónoma de Galicia, satisfarán a tarifa 68 da modalidade de actuacións profesionais incluída no Anexo 3, coa finalidade de compensar os custos do investimento que soporte a dita Administración e de atender aos gastos de explotación e conservación de tales obras.”

2) Introdúcese un novo punto no artigo 27, coa redacción que se transcribe a seguir, sendo numerado como 5 e sendo reenumerado o actual punto 5 como o 6:

“5. Na tarifa 68 da modalidade de actuacións profesionais contida no Anexo 3, serán suxeitos pasivos as persoas naturais ou xurídicas así como as entidades ás que se refire o

punto 2 deste artigo, beneficiadas polas obras de regulación.

As entidades subministradoras de auga potable beneficiadas pola regulación de augas superficiais, con captacións situadas augas abaixo das presas xestionadas por Augas de Galicia e/ou que capten directamente do encoro, serán suxeitos pasivos desta tarifa sempre que non teñan asumida a explotación, conservación e mantemento destas presas e actúen con carácter oneroso.

3) Substitúese no punto 4 do artigo 30 a expresión “Os informes de avaliación dos ensaios clínicos ou estudos post-autorización con medicamentos de uso humano ou produtos sanitarios”, pola expresión: “Os informes de avaliación dos ensaios clínicos con medicamentos de uso humano ou produtos sanitarios, ou estudos post-autorización de seguimento prospectivo, así como doutros estudos neste ámbito”.

4) Introdúcese un novo punto no artigo 31, coa redacción que se transcribe a seguir, sendo numerado como punto 3 e sendo reenumerado o actual punto 3 como o punto 4:

“3. A obriga de satisfacer a tarifa 68 da modalidade de actuacións profesionais, contida no Anexo 3, ten carácter periódico e anual e nace no momento en que se produza a mellora ou o beneficio dos usos ou bens afectados.”

5) Modifícase o artigo 32, engadíndolle o seguinte parágrafo:

“A contía da tarifa 68 da modalidade de actuacións profesionais da taxa por servizos profesionais contida no Anexo 3 fíxase para cada exercicio orzamentario, sumando as seguintes cantidades:

- a) o total previsto de gastos de funcionamento e conservación das obras realizadas.
- b) os gastos de administración do organismo xestor, imputables a ditas obras.
- c) o 4% do valor das inversións realizadas pola Administración hidráulica da Comunidade Autónoma de Galicia, debidamente actualizado, tendo en conta a amortización técnica das obras e instalacións e a depreciación da moeda.

A distribución individual de dito importe global entre todos os beneficiados polas obras, realizarase consonte criterios de racionalización do uso da auga, equidade no reparto das obrigas e autofinanciamento do servizo.

No caso de entidades subministradoras de auga potable imputarase o monto total dos tres apartados anteriores en función do volume total de auga captada, expresada en metros cúbicos”.

6) Modifícase o artigo 42, engadíndolle o punto 4 coa seguinte redacción:

“4. No caso da tarifa 05, contida no anexo 5, será aplicable o seguinte:

- a) a base sobre a que se aplican os tipos de gravame establecidos no apartado 01, así como as bases sectorial e adicional contidas no apartado 02 para o caso de servizos executados a través de canalizacións de titularidade da administración autonómica, actualízanse anualmente segundo o coeficiente de actualización que se estableza na Lei de orzamentos xerais da comunidade autónoma de Galicia de cada ano.
- b) Na tarifa contida no apartado 01, cando se empreguen procedementos de licitación pública para o outorgamento de concesións, os pregos de bases poderán conter, entre os criterios para a súa resolución, o de que os licitadores oferten importes adicionais ós establecidos para esta taxa. Neste caso, o tipo de gravame da taxa virá determinado pola suma de dous compoñentes."

7) Engádeselle unha disposición transitoria coa redacción que se transcribe a seguir, quedando a actual disposición transitoria única, denominada como "disposición transitoria primeira":

"Disposición Transitoria Segunda. Obras de regulación de recursos hídricos.

Para as inversións en obras de regulación feitas con anterioridade ao 1 de xaneiro de 2012, a obriga de satisfacer a tarifa 68 da modalidade de actuacións profesionais da taxa por servizos profesionais contida no Anexo 3 da Lei 6/2003, do 9 de decembro, de taxas, prezos e exaccións reguladoras da Comunidade Autónoma de Galicia, nace o 1 de xaneiro de 2012."

8) Modifícase a denominación da tarifa contida na subalínea 01 da alínea 07, do Anexo I, substituíndo <<Máquinas tipo "B">> por <<Máquinas tipo "B" ou "B especial" >>

9) Modifícase a denominación da tarifa contida na subalínea 03 da alínea 07, do Anexo I, substituíndo <<Máquinas tipo "B">> por <<Máquinas tipo "B" ou "B especial" >>

10) Modifícase a denominación da tarifa contida na subalínea 07 da alínea 07, do Anexo I, substituíndo <<Máquinas tipo "B">> por <<Máquinas tipo "B" ou "B especial" >>

11) Modifícase a denominación da tarifa contida na subalínea 08 da alínea 07 do Anexo I, substituíndo <<Máquinas tipo "B">> por <<Máquinas tipo "B" ou "B especial" >>

12) Modifícase a denominación da tarifa contida na subalínea 14 da alínea 07, do Anexo I, substituíndo <<Máquinas tipo "B">> por <<Máquinas tipo "B" ou "B especial">>

13) Modifícase a denominación da tarifa contida na subalínea 15 da alínea 07 do Anexo I, substituíndo <<Máquinas tipo "B">> por <<Máquinas tipo "B" ou "B especial">>

14) Modifícase a subalínea 16 da alínea 07 do Anexo I, quedando redactada como segue:

16 Inscrición no Rexistro de modelos de modificacións non substanciais da inscrición segundo o tipo de máquina

- Máquinas tipo "A"	15,34
- Máquinas tipo "A especial"	46,62
- Máquinas tipo "B" ou "B especial"	92,00
- Máquinas tipo "C"	110,39

15) Modifícase a denominación da tarifa contida na subalínea 17 da alínea 07 do Anexo I, substituíndo <<Máquinas tipo "B">> por <<Máquinas tipo "B" ou "B especial">>

16) Modifícase a denominación da tarifa contida na subalínea 18 da alínea 07 do Anexo I, substituíndo <<Máquinas tipo "C">> por <<Máquinas tipo "C" ou "B especial">>

17) Modifícase a denominación da tarifa contida na subalínea 19 da alínea 07 do Anexo I, substituíndo <<Máquinas tipo "B">> por <<Máquinas tipo "B" ou "B especial">>

18) Modifícase a denominación da tarifa contida na subalínea 20 da alínea 07 do Anexo I, substituíndo <<Máquinas tipo "B">> por <<Máquinas tipo "B" ou "B especial">>

19) Modifícase a denominación da tarifa contida na subalínea 21 da alínea 07 do Anexo I, substituíndo <<Máquinas tipo "B">> por <<Máquinas tipo "B" ou "B especial">>

20) Modifícase a denominación da tarifa contida na subalínea 23 da alínea 07, do Anexo I, quedando redactada como segue:

"Autorización de instalación do centro de control do sistema de interconexión de máquinas de xogo tipo "B" ou "B especial" entre salóns ou bingos"

21) Modifícase a denominación da tarifa contida na subalínea 24 da alínea 07, do Anexo I, quedando redactada como segue:

"Autorización de instalación do centro de control do sistema de interconexión de máquinas de xogo tipo "C" ou "B especial" entre casinos."

22) Modifícase a denominación da tarifa contida na subalínea 26 da alínea 07 do Anexo I, substituíndo <<Máquinas tipo "B">> por <<Máquinas tipo "B" ou "B especial">>

23) Modifícase a denominación da tarifa contida na subalínea 27 da alínea 07 do Anexo I, substituíndo <<Máquinas tipo "B">> por <<Máquinas tipo "B" ou "B especial">>

24) Modifícase a denominación da tarifa contida na subalínea 28 da alínea 07 do Anexo I, substituíndo <<Máquinas tipo "B">> por <<Máquinas tipo "B" ou "B especial">>

25) Engádeselle a subalínea 29 á alínea 07 do Anexo I, quedando redactada como segue:

29	Outras autorizacións e comunicacións	92,80
----	--------------------------------------	-------

26) Modifícase a denominación da tarifa contida na subalínea 08 da alínea 10 do Anexo I, quedando redactada como segue:

08	Homologación de material de xogo do regulamento do bingo	
	- Homologación dos elementos materiais e da infraestrutura e elementos técnicos para explotación do xogo do bingo electrónico	1.500,00
	- Modificación da homologación dos elementos materiais e da infraestrutura e elementos técnicos para explotación do xogo do bingo electrónico	160,00
	- Homologación de calquera outro material de xogo do bingo	200,00

27) Engádenselle as subalíneas 17, 18, 19, 20 e 21 á alínea 10 do Anexo I, quedando redactadas como segue:

17	Autorización de instalación para explotación da modalidade de bingo electrónico.	238,00
18	Modificación ou cancelación de autorizacións de instalación para explotación da modalidade de bingo electrónico.	160,00
19	Inscripción de sociedades anónimas para interconexiónado entre salas de bingo electrónico.	238,00
20	Modificación ou cancelación de sociedades anónimas para interconexiónado entre salas de bingo electrónico	160,00
21	Autorización do programa de xogo de modalidade de xogo do bingo electrónico	200,00

28) Suprímese a subalínea 09 da alínea 11 do Anexo I.

29) Modifícase a denominación da alínea 13 do Anexo I, quedando redactada como segue:

“Rifas, tómbolas, combinacións aleatorias e lotarías”

30) Modifícase a subalínea 05 da alínea 17 do Anexo I, quedando redactada como segue:

05	<i>Autorización de construción de novas embarcacións</i>	
	<i>De 0 a 2,5 GT:</i>	20
	<i>De 2,5 GT a 50 GT:</i>	28
	<i>De 50 GT a 150 GT:</i>	39
	<i>Máis de 150 GT:</i>	55

31) Modifícase a subalínea 06 da alínea 17 do Anexo I, quedando redactada como segue:

06	<i>Autorización de obras de modernización e reconversión de buques:</i>	
	<i>De 0 a 2,5 GT:</i>	16
	<i>De 2,5 GT a 50 GT:</i>	22
	<i>De 50 GT a 150 GT:</i>	31
	<i>Máis de 150 GT:</i>	44

32) Modifícase na subalínea 03 da alínea 20 do Anexo I, a denominación dos títulos de “Conservación e restauración de bens culturais”, “Superior de Música”, “Deseño” e “Superior de Arte Dramática” contidos na primeira columna da táboa, quedando denominados como “Graduado/a en Conservación e Restauración de Bens Culturais”, “Graduado/a en Música”, “Graduado/a en Deseño” e “Graduado/a en Arte Dramática”, respectivamente.

33) Engádenselle as subalíneas 03, 04, 05 e 06 á alínea 22 do Anexo I, quedando redactada como segue:

03	<i>Autorización previa de publicidade das actividades de xogo</i>	255
04	<i>Autorización de instalación e apertura de locais presenciais abertos o público para a explotación de xogos e apostas da competencia do Estado</i>	1000
05	<i>Autorización de instalación de terminais ou equipos que permitan a participación nos xogos, apostas e lotarías da competencia do Estado, nos locais de xogo, nos establecementos de hostalería e análogos, ou en calquera outro local presencial aberto ao público. Por cada terminal</i>	100

06	Autorización para a organización, a explotación e o desenvolvemento de xogos e apostas por medios ou sistemas informáticos interactivos ou de comunicación a distancia	1000
07	Autorización de instalación de terminais de xogo en bares, cafeterías, establecementos de hostalería e análogos, por cada terminal	100

34) Modifícase a denominación da tarifa contida na alínea 23 do Anexo I, quedando redactada como segue:

“Devolución, substitución ou modificación de fianzas constituídas por actividades de xogo”

35) Modifícanse as letras a) e b) contidas na alínea 27 do anexo I, quedando redactadas como segue:

a) Documentos

- Formato DIN A4 (€/copia)	0,10
- Formato DIN A3 (€/copia)	0,25
- Mínimo	5,00

b) Planos

- Formato DIN A4 (€/copia)	0,30
- Formato DIN A3 (€/copia)	0,43
- Formato superior a DIN A3 (€/copia)	0,56
- Mínimo	5,00

36) Engádeselle a alínea 49 ao Anexo I, quedando redactada como segue:

49	Habilitación do persoal para exercicio de funcións de socorrista acuático	49,30
----	---	-------

37) Engádeselle a alínea 50 ao Anexo I, quedando redactada como segue:

50	Homologación de actividades formativas en materia de seguridade	80,69
----	---	-------

38) Engádeselle a alínea 51 ao Anexo I, quedando redactada como segue:

51	Apostas	
01	Actividades empresas de fabricación e importación de material de apostas	
	- Inscripción da empresa e autorización de comercialización	238,00

	- Modificación ou cancelación da inscrición da autorización	160,00
	- Revisión da autorización cada 5 anos	180,00
02	Actividades de explotación de apostas	
	- Autorización e, de ser o caso, inscrición	238,00
	- Revisión da vixencia da autorización	180,00
	- Modificación da autorización	160,00
	- Modificación da inscrición	160,00
03	Establecementos e lugares de apostas	
	- Autorización de tendas de apostas	1000,00
	- Modificación ou cancelación de tendas de apostas	160,00
	- Autorización de instalación de espazos de apostas en salóns de xogo, bingos e casinos. Por cada terminal instalado	100,00
	- Revisión da autorización cada 5 anos	100,00
	- Autorización de instalación de espazos de apostas en recintos deportivos e autorización temporal de espazos de apostas en actividades feirais de actividades deportivas, por cada terminal instalado	100,00
	- Revisión da autorización cada 5 anos, por cada terminal instalado	100,00
04	Homologación do material de apostas (sistemas, terminais e demais elementos de xogo) e inscrición no Rexistro de Apostas dos modelos de sistemas e máquinas de apostas	
	- Homologación do material de apostas e inscrición	1500,00
	- Modificación da homologación ou cancelación de material de apostas e modificación da inscrición	160,00
05	Autorización da instalación de máquinas auxiliares de apostas (en establecementos de hostalaría). Por cada máquina auxiliar instalada	
	- Autorización da instalación	100,00
	- Modificación da autorización	100,00
	- Dilixenciado das comunicacións	25,00

39) Engádeselle a alínea 52 ao anexo I, quedando redactada como segue:

52	<i>Actividades nas instalacións xuvenís e de tempo libre e ao aire libre</i>	
01	<i>Actuacións de control de inicio da actividade e/ou modificacións substanciais nas instalacións xuvenís</i>	60
02	<i>Actuacións de control de inicio de actividades de escolas de tempo libre</i>	60
03	<i>Actuacións de control de inicio de actividades ao aire libre</i>	10
04	<i>Expedición de títulos acreditativos da formación de monitor e director de actividades de tempo libre e de campos de traballo e/ou homologación destes títulos expedidos por outras comunidades autónomas ou outros estados membros</i>	11

40) Engádeselle a alínea 53 ao anexo 1, quedando redactada como segue:

53	<i>Renovación ou reposición de tarxeta sanitaria</i>	10
----	--	----

41) Modifícase a subalínea 06 da alínea 04 do Anexo 2, quedando redactada como segue:

06	<i>Rexistro oficial de establecementos e servizos de produtos fitosanitarios</i>	
	<i>- Primeira inscrición</i>	60
	<i>- Modificación da inscrición</i>	30
	<i>- Renovación da inscrición</i>	60

42) Modifícase a denominación da tarifa contida na subalínea 08 da alínea 04 do Anexo 2, quedando redactada como segue:

“Explotación de datos estatísticos oficiais incluídos nesta alínea”

43) Engádese a subalínea 09 á alínea 04 do Anexo 2, quedando redactada como segue:

09	<i>Rexistro oficial de produtores, comerciantes e importadores de vexetais e produtos vexetais</i>	
	<i>Inscrición no rexistro oficial de produtores e comerciantes de vexetais e produtos vexetais</i>	60
	<i>Toma de mostras para a súa análise en laboratorio, por cada mostra</i>	6

Inspección oficial para autorización emisión pasaporte fitosanitario 30

Custo da etiqueta do pasaporte fitosanitario, por cada xogo de tres etiquetas coa mesma numeración 0,10

44) No cadro incluído na subalínea 01 da alínea 08 do anexo 2, modifícanse as categorías de gando vacún, de forma que, onde pon: "Vacúns pesados (máis de 24 meses)", "Vacúns novos (de 24 meses ou menos)", pasará a poñer: "Vacúns pesados (máis de 218 kg/canal)" e "Vacúns novos (menos de 218 kg/canal)", respectivamente.

45) Modifícase a denominación da subalínea 01 da alínea 10 do anexo 2, pasando a denominarse: Expedición e/ou Modificación da autorización sanitaria de funcionamento.

46) Suprímese a subalínea 02 da alínea 10 do anexo 2.

47) Suprímese a tarifa aplicable á renovación da inscrición no Rexistro oficial de establecementos e servizos biocidas da Comunidade Autónoma de Galicia na subalínea 13 da alínea 12 do Anexo 2.

48) Modifícase a denominación da tarifa contida na subalínea 01 da alínea 19 do Anexo 2, quedando redactada como segue:

"Clasificación e calquera tipo de cambio ou reforma substancial respecto das condicións nas que fose outorgada a clasificación de establecementos hoteleiros e extrahoteleiros, apartamentos turísticos, vivendas turísticas, albergues turísticos e turismo rural."

49) Modifícase a denominación da tarifa contida na subalínea 05 da alínea 19 do Anexo 2, quedando redactada como segue:

"Clasificación e calquera tipo de cambio ou reforma substancial respecto das condicións nas que fose outorgada a clasificación de restaurantes, cafeterías e furanchos."

50) Modifícase a denominación da tarifa contida na subalínea 06 da alínea 19 do Anexo 2, quedando redactada como segue:

"Expedición da habilitación de guía de turismo de Galicia"

51) Modifícase a denominación da tarifa contida na subalínea 07 da alínea 19 do Anexo 2, quedando redactada como segue:

"Inscrición para participar nos exames para a habilitación de guía de turismo de Galicia"

52) Modifícase a denominación da tarifa contida na subalínea 08 da alínea 19 do

Anexo 2, quedando redactada como segue:

“Renovación das habilitacións de guía de turismo de Galicia”

53) Modifícase a alínea 27 do anexo 2, quedando redactada como segue:

27	<i>Programas e centros de servizos sociais</i>	
01	<i>Autorización de programas e centros</i>	
	- <i>Creación/construción/modificación substancial de centros</i>	60
	- <i>Inicio de actividades de centros</i>	80
	- <i>Inicio de actividades de programas e servizos complementarios</i>	40
02	<i>Acreditación de servizos sociais</i>	
	- <i>Acreditación de centros</i>	102
	- <i>Acreditación de programas e servizos</i>	40

54) No cadro incluído na subalínea 01 da alínea 36 do anexo 2, modifícanse as tarifas correspondentes ao grupo de “ovinos, caprinos e outros ruminantes” quedando redactado como segue:

OVINO, CAPRINO E OUTROS RUMINANTES:

<i>animais de 12 ou máis kg de canal</i>	0,25411
<i>animais de menos de 12 kg de canal</i>	0,10291

55) Modifícase a redacción da alínea 41 do anexo 2, de xeito que a expresión “Centros colaboradores homologados para impartir cursos de formación ocupacional” queda substituída por “Centros colaboradores para impartir cursos de formación para o emprego”.

56) Modifícase a denominación da tarifa contida na subalínea 02 da alínea 41 do anexo 2, de xeito que a expresión: “Homologación de novas especialidades formativas (Por cada especialidade)”, queda substituída por: “Inscripción/acreditación de novas especialidades formativas (Por cada especialidade)”.

57) Modifícase a denominación da tarifa contida na subalínea 19 da alínea 07 do Anexo 3, quedando redactada como segue:

“Cambio de titularidade ou ampliación/redución nos campos de actuación dun organismo de control: o 50% do subalínea 15”

58) Modifícase a subalínea 22 da alínea 07 do Anexo 3, quedando redactada como segue:

22 *Presentación de declaracións responsables de inicio de actividade.* 58,37

59) Modifícase a subalínea 23 da alínea 07 do Anexo 3, quedando redactada como segue:

23 *Presentación de declaracións responsables de modificación ou cese de actividade* 26,05

60) Engádeselle a subalínea 24 á alínea 07 do Anexo 3, quedando redactada como segue:

24 *Expedición de certificados de empresa para a comercialización e manipulación de gases fluorados.* 58,37

61) Engádeselle a subalínea 25 á alínea 07 do Anexo 3, quedando redactada como segue:

25 *Autorización de distribuidores de halóns* 88,21

62) Modifícase a denominación da tarifa contida na alínea 18 do Anexo 3, quedando redactada como segue:

“Autorización de instalacións de transporte e distribución de enerxía eléctrica e gas”

63) Modifícase a subalínea 09 da alínea 36 do Anexo 3, quedando redactada como segue:

09 *Permiso / Concesión de actividade en materia de acuicultura* 300

64) Modifícase a subalínea 10 de alínea 36 do Anexo 3, quedando redactada como segue:

10 *Autorización de inmersión* 2

65) Engádeselle a subalínea 06 á alínea 37 do Anexo 3, quedando redactada como segue:

06 *Autorización administrativa doutras instalacións de produción en réxime especial. Sobre a tarifa consignada no código 32.09.00, o* 150%

66) Modifícase a denominación da alínea 39 do Anexo 3, quedando redactada como segue:

“Talleres de tacógrafos e de limitadores de velocidade”

67) Modifícase a denominación da tarifa contida na subalínea 02 da alínea 39 do Anexo 3, quedando redactada como segue:

02 *Renovación da autorización e inscrición, cambio de titularidade, cambio de situación ou cambio do responsable elou do técnico: sobre a tarifa anterior devengárase o 50% dela.*

68) Modifícase a alínea 51 do Anexo 3, quedando redactada como segue:

51 *Autorización comercial autonómica para a instalación, ampliación e traslado de establecementos comerciais por metro cadrado de superficie útil para exposición e venda ó público* 4,79

69) Suprímese a subalínea 01 da alínea 58 do Anexo 3.

70) Modifícase a redacción da alínea 59 contida no anexo 3, substituíndo a expresión: “Informe de avaliación de ensaios clínicos e de estudos post-autorización para medicamentos de uso humano e produtos sanitarios” pola de “Informe de avaliación de ensaios clínicos con medicamentos de uso humano ou produtos sanitarios, de estudos post-autorización de seguimento prospectivo e doutros estudos neste ámbito”.

71) Modifícase a denominación da subalínea 01 da alínea 59 do anexo 3, substituíndo a expresión: “Avaliación de novos ensaios clínicos actuando o CEIC de Galicia como implicado” pola de: “Avaliación de novos ensaios clínicos con medicamentos de uso humano ou produtos sanitarios, actuando o CEIC de Galicia como implicado”.

72) Modifícase a denominación da subalínea 02 da alínea 59 do anexo 3, substituíndo a expresión: “Avaliación de novos ensaios clínicos, actuando o CEIC de Galicia como CEIC de referencia”, pola de “Avaliación de novos ensaios clínicos, con medicamentos ou produtos sanitarios, actuando o CEIC de Galicia como CEIC de referencia”.

73) Modifícase a denominación da subalínea 03 da alínea 59 do anexo, de xeito que onde di: “Avaliación de novos estudos post-autorización, por avaliación global”, deberá dicir: “Avaliación de novos estudos post-autorización de seguimento prospectivo, por avaliación global”.

74) Modifícase a denominación da subalínea 04 da alínea 59 do anexo 3, substituíndo a expresión: “Modificacións relevantes ós protocolos de ensaios clínicos aprobados”, pola

de: “Modificacións relevantes ós protocolos de ensaios clínicos con medicamentos de uso humano ou produtos sanitarios aprobados”.

75) Engádeselle a subalínea 05 á alínea 59 contida no anexo 3, coa seguinte redacción:

05 *Avaliación doutros estudos non incluídos nos apartados anteriores* 111,00

76) Modifícase a alínea 62 do Anexo 3, quedando redactada como segue:

62 *Recoñecemento de organización de produtores* 600

77) Modifícase a redacción da alínea 63 do Anexo 3, quedando redactada como segue:

“Dirección dos contratos de servizo en materia de augas e infraestruturas”

78) Engádeselle a alínea 68 ao Anexo 3, quedando redacta como segue:

68 *Obras hidráulicas de regulación xestionadas pola Administración Hidráulica da Comunidade Autónoma de Galicia, por metro cúbico de auga captado* 0,017

79) Engádeselle a alínea 05 ao Anexo 5, quedando redactada como segue:

“05 Dominio público viario

01 Utilización privativa ou ocupación do dominio público viario.

Constitúe a base impoñible o valor de mercado do ben ou bens de dominio público viario obxecto da utilización privativa ou ocupación do dominio público viario. A estes efectos, tomaranse como valores de mercado os seguintes:

- Solo en situación urbanizada: 45,80 €/m².
- Solo en situación rural: 12,30 €/m².

Tendo en conta a relevancia e conexión coas finalidades propias do órgano ó que está adscrito o dominio público viario, o predominio desas finalidades ou de fins económicos na actividade desenvolvida e o grado de utilidade pública derivada da utilización privativa ou da ocupación do dominio público viario, en cada caso, o tipo de gravame aplicable fíxase nas seguintes porcentaxes:

- Instalacións en superficie para a prestación dun servizo público de interese xeral: 4%.
- Instalacións en superficie para a conexión a un servizo público de interese xeral: 3%.
- Obras de acceso á estrada: 3%.

- Instalacións provisionais por prazo fixado: 2%.

Cando se empreguen procedementos de licitación pública para o outorgamento de concesións, os pregos de bases poderán conter, entre os criterios para a súa resolución, o de que os licitadores oferten importes adicionais ós establecidos para esta taxa. Neste caso, o tipo de gravame da taxa virá determinado pola suma de dous compoñentes:

- A porcentaxe vixente no momento do devengo.
- A mellora determinada polo adxudicatario na proposición sobre a que se realiza a concesión, expresada en puntos porcentuais.

02 Aproveitamento especial do dominio público viario

Constitúe a base imponible a utilidade derivada do aproveitamento especial do dominio público viario. A estes efectos, establécese como base imponible a que se obtén da seguinte fórmula:

$$B_i = L \cdot \left(B_s + \frac{B_a}{n} \right) \cdot C_d \cdot C_u \cdot C_e$$

Onde:

- B_i = base imponible.
- L = lonxitude (m) do servizo que discorre por dominio público viario.
- B_s = base sectorial que adopta os seguintes valores en función do tipo de actividade:
 - Distribución de electricidade en baixa ou media tensión: 1,58 €/m.
 - Distribución de electricidade en alta tensión: 2,45 €/m.
 - Transporte de electricidade en alta tensión: 4,94 €/m.
 - Distribución de hidrocarburos: 6,97 €/m.
 - Transporte de hidrocarburos: 18,57 €/m.
 - Telefonía e telecomunicacións: 4,11 €/m.
 - Abastecemento de auga: 1,61 €/m.
 - Saneamento: 4,07 €/m.
- B_a = base adicional para o caso de servizos executados a través de canalizacións de titularidade da administración autonómica, que adopta un valor de 1,00 €/m nese caso, sendo nula en caso contrario.
- n = número de suxeitos pasivos diferentes que empregan a mesma canalización.
- C_d = coeficiente de densidade de poboación, calculado segundo a fórmula seguinte:

$$C_d = \sqrt{\frac{\phi_m}{\phi_G}} \leq 3$$

; onde:

- ϕ_m = densidade de poboación (hab/km²) do termo municipal no que se sitúe o servizo, segundo as cifras oficiais de poboación a 1 de xaneiro do ano anterior ó de devengo da taxa.
- ϕ_G = densidade de poboación (hab/km²) da comunidade autónoma de Galicia, segundo as cifras oficiais de poboación a 1 de xaneiro do ano anterior ó de devengo da taxa.
- C_u = coeficiente pola situación urbanística do solo, que adopta os seguintes valores:
 - 1,00 en solo en situación urbanizada.
 - 0,75 en solo en situación rural.
- C_e = coeficiente pola clasificación da estrada:
 - 1,20 no caso de autoestradas, autovías, corredores e vías rápidas.
 - 1,00 no caso do resto de estradas da rede primaria básica non incluídas na categoría anterior.
 - 0,80 no caso de estradas da rede primaria complementaria.
 - 0,60 no caso de estradas da rede secundaria.

O tipo de gravame aplicable nos supostos de aproveitamento especial será do 100%."

Artigo 9º.- Canon da auga.

Un.- Engádense uns novos apartados d) e e) na alínea segunda do artigo 47 da Lei 9/2010, do 4 de novembro, de augas de Galicia, co seguinte contido:

"d.- Os usos destinados a unha unidade de convivencia independente que acrediten, nas condicións que regulamentariamente se establezan, estar en situación de exclusión social de acordo coa lexislación en materia de servizos sociais e inclusión social de Galicia. A exención terá efectos a partir do primeiro día natural do terceiro mes seguinte á súa acreditación, ou ben no seguinte período de liquidación no caso de fontes propias.

e.- Os usos da auga por parte de entidades de iniciativa social, tanto públicas como privadas, sen ánimo de lucro realizados en centros que presten servizos directos a persoas en risco ou en situación de exclusión social, de acordo coa lexislación en materia de servizos sociais e inclusión social de Galicia. A exención terá efectos a partir do primeiro día natural do terceiro mes seguinte á súa acreditación, ou ben no seguinte período de liquidación no caso de fontes propias."

Dous.- Modifícase a alínea terceira do artigo 61 da Lei 9/2010, do 4 de novembro, de augas de Galicia, que queda redactada como segue:

“3.- Nas augas mariñas en acuicultura a parte variable da cota calcularase a partir da produción segundo o tipo de gravame de 5 €/Tm.”

Artigo 10º.- *Coeficiente de vertedura a sistemas públicos de depuración de augas residuais.*

Un.- Modifícase a alínea terceira do artigo 66 da Lei 9/2010, do 4 de novembro, de augas de Galicia, que queda redactado como segue:

“3. As normas de aplicación do canon da auga previstas nos artigos 62 a 65 da presente Lei, así como os artigos 46 e 47, rexen igualmente para a aplicación do coeficiente de vertedura. A repercusión do coeficiente de vertedura por parte das entidades subministradoras nas súas facturas-recibo deberase levar a cabo de forma diferenciada da do canon da auga.”

Dous.- Engádese unha nova alínea cuarta no artigo 66 da Lei 9/2010, do 4 de novembro, de augas de Galicia, co seguinte contido:

“4. Nos supostos de contribuíntes que non se abastezan de entidade subministradora, as entidades prestadoras do servizo de sumidoiros terán a condición de suxeitos pasivos substitutos de contribuínte, estando obrigadas a repercutir o coeficiente de vertedura ao contribuínte, quen queda obrigado a soportalo, ao mesmo tempo que a contraprestación correspondente ao servizo de sumidoiros, así como a cumprir o resto das obrigas establecidas neste Título ás entidades subministradoras de auga. Esta obriga estenderase ás prestacións do servizo non facturadas, que se liquidarán nos mesmos termos que os indicados para os subministros non facturados no artigo 63.”

Tres.- Modifícase o artigo 70 da Lei 9/2010, do 4 de novembro, de augas de Galicia, que queda redactado como segue:

“Artigo 70º.- Cota tributaria

A cota tributaria do coeficiente de vertedura resultará da adición dunha parte fixa e dunha parte variable determinadas consonte ao previsto nos artigos 52º a 61º desta lei, agás o previsto no artigo 53.7. “

Catro.- Engádese unha nova disposición transitoria sétima á Lei 9/2010, do 4 de novembro, de augas de Galicia, co seguinte contido:

“Sétima. Primeiro ano de aplicación do coeficiente de vertedura

Nos supostos de instalacións de depuración que no momento de entrada en vigor do regulamento que desenvolva o coeficiente de vertedura estean xestionadas pola Administración Hidráulica de Galicia ou por un Consorcio onde participe esta, a cota do coeficiente de vertedura verase afectada por un factor de 0,5 durante o ano 2012."

Artigo 11º.- *Xestión das débedas polos tributos sobre a auga.*

Modifícase a disposición adicional 14 Lei 9/2010, do 4 de novembro, de augas de Galicia, que queda redactada como segue:

"Décimo cuarta.- Anulación e non liquidación de débedas polos tributos establecidos nesta lei.

A non liquidación de débedas ou a anulación e baixa en contabilidade de débedas xa liquidadas en concepto de canon da auga e de coeficiente de vertedura cando a súa execución resulte antieconómica, regularase consonte co disposto no artigo 23.5 do Texto refundido da Lei de réxime financeiro e orzamentario de Galicia, aprobado por Decreto lexislativo 1/1999. Para estes efectos, o órgano xestor destes tributos fará unha memoria económica que xustifique e determine o umbral de antieconomicidade no que se considere que se produce aquel efecto para cada un dos tributos sinalados. A memoria deberá ser remitida á consellería competente en materia de facenda, que en atención á política xeral na materia disporá o límite cuantitativo mediante a normativa correspondente."



TÍTULO II: MEDIDAS ADMINISTRATIVAS

III. TÍTULO II: MEDIDAS ADMINISTRATIVAS

CAPÍTULO I *Réxime orzamentario das Entidades do sector público*

Artigo 12º.- *Orzamentos dos organismos autónomos e axencias públicas autonómicas.*

Un.- Modifícase o título do Capítulo IV do Título III do Texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, que queda redactado como segue:

“CAPÍTULO IV

Normas de especial aplicación para os organismos autónomos e axencias públicas autonómicas.”

Dous.- Modifícase o artigo 82 do Texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, que queda redactado como segue :

“Artigo 82º.- Orzamentos dos organismos autónomos e axencias públicas autonómicas.

1.- Dos orzamentos dos organismos autónomos e axencias públicas autonómicas formarán parte os seguintes estados financeiros:

- a) Conta de operacións comerciais, se é o caso.
- b) Estado demostrativo da variación do fondo de manobra.
- c) Conta financeira con resultado en termos de contabilidade nacional.

2.- O resultado que se derive dos estados financeiros correspondentes ás alíneas a) e b) do número anterior terá o adecuado reflexo no orzamento de ingresos do organismo autónomo ou axencia pública autonómica respectiva.

3.- As operacións propias da actividade específica destes entes instrumentais, recollidas na conta de operacións comerciais, non estarán sometidas ó réxime de limitacións establecido no artigo 56 desta lei para os créditos incluídos nos estados de gastos dos seus orzamentos.

4.- A consellería competente en materia de facenda establecerá as estruturas dos estados financeiros indicados adaptados ás súas distintas especialidades, así como os criterios xerais que se aplicarán para a imputación de gastos á conta de operacións comerciais, segundo o principio xeral de que, agás os gastos xerais de persoal, se lle poderán imputar

a esta todos aqueles gastos que forman parte directa ou indirectamente do custo dos produtos vendidos, dos servizos prestados ou dos bens producidos.

5.- O exercicio orzamentario coincidirá co ano natural, sen prexuízo dos axustes necesarios cando as operacións que realicen os organismos autónomos e as axencias públicas autonómicas estean vinculadas a un ciclo produtivo distinto que non poderá ser superior a doce meses.”

Artigo 13º.- *Réxime orzamentario das entidades instrumentais do sector público autonómico con orzamento estimativo.*

Un.- Modifícase o título do Capítulo V do Título III do Texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, que queda redactado como segue:

“Capítulo V

Normas de especial aplicación ás entidades instrumentais do sector público autonómico con orzamento estimativo.”

Dous.- Engádese un novo artigo 82 bis ao Texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, co seguinte contido:

“Artigo 82 bis.- Orzamento

1.- Son entidades instrumentais do sector público autonómico con orzamento estimativo as entidades públicas empresariais, as sociedades mercantís públicas autonómicas, as fundacións do sector público autonómico, os consorcios públicos autonómicos e demais entidades instrumentais do sector público autonómico non recollidas no orzamento consolidado.

2.- As devanditas entidades elaborarán un orzamento de explotación que detallará os recursos e dotacións anuais correspondentes. Así mesmo, formarán un orzamento de capital co mesmo detalle.

Os orzamentos de explotación e de capital integraranse nos orzamentos xerais da comunidade autónoma.

Os orzamentos de explotación e de capital estarán constituídos por unha previsión da conta de resultados e do cadro de financiamento do correspondente exercicio. Como anexo aos devanditos orzamentos engadirase unha previsión do balance da entidade, así como a documentación complementaria que determine a Consellería de Facenda.

3.- As entidades remitirán os orzamentos e anexos sinalados no apartado anterior referidos, ao exercicio relativo ao proxecto de orzamentos xerais da comunidade autónoma, á liquidación do último exercicio pechado e ao avance da liquidación do exercicio corrente.

4.- Xunto cos orzamentos de explotación e de capital, remitirase polas entidades unha memoria explicativa do seu contido, da execución do exercicio anterior e da previsión da execución do exercicio corrente.”

Artigo 14º.- *Plan de actuación, investimentos e financiamento.*

Modifícase o artigo 83 do Texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, que queda redactado como segue:

“Artigo 83.- Plan de actuación, investimentos e financiamento

1.- As entidades instrumentais do sector público autonómico con orzamento estimativo con arranxo ao disposto no artigo 82 bis desta lei formularán e actualizarán, de xeito anual, un plan de actuación, investimentos e financiamento.

2.- Non están obrigadas a presentar o devandito plan aquelas entidades instrumentais que, de acordo co disposto na normativa contable vixente, poidan presentar balance abreviado, agás que reciban con cargo aos orzamentos xerais da comunidade autónoma subvencións de explotación ou capital ou outra achega de calquera natureza. Tampouco terán que presentar o plan de actuación, investimentos e financiamento as fundacións do sector público autonómico.

3.- As entidades instrumentais do sector público autonómico con orzamento estimativo que posúan, directa ou indirectamente, a maioría do capital social dunha ou varias sociedades mercantís deberán presentar os seus orzamentos de explotación e capital e, no seu caso, os seus plans de actuación, investimentos e financiamento de xeito individual e consolidado con ditas sociedades mercantís, relacionando as sociedades obxecto de presentación consolidada. Esta norma non se aplicará a aquelas sociedades mercantís autonómicas que, á súa vez, estean participadas maioritariamente, de xeito directo ou indirecto, por outra entidade que deba elaborar os orzamentos de explotación e de capital.”

Artigo 15º.- *Definición, contido e tramitación.*

Modifícase o artigo 84 do Texto refundido da Lei de réxime financeiro e orzamen-

tario de Galicia, aprobado polo Decreto legislativo 1/1999, do 7 de outubro, que queda redactado como segue:

“Artigo 84.- Definición, contido e tramitación do plan de actuación, investimentos e financiamento

1.- O plan de actuación, investimentos e financiamento é a expresión plurianual da estratexia, as actuacións e o financiamento dun ente instrumental. Nel concretarase como desenvolverá a medio prazo o seu obxecto e como contribuirá a acadar os obxectivos dos programas orzamentarios que o financian, se é o caso.

Este plan estará integrado polos orzamentos e anexos determinados no artigo 82 bis desta lei e, xunto coa documentación indicada no apartado seguinte, reflectirá os datos económico-financeiros previstos para o exercicio que atinxe ao proxecto de orzamentos xerais da comunidade autónoma e aos dous exercicios seguintes, segundo as liñas estratéxicas e obxectivos definidos para a entidade.

2.- O antedito plan conterá a información de carácter complementario seguinte:

a) Hipótese da evolución dos principais indicadores macroeconómicos que serviran de base para a elaboración do plan de actuación, investimentos e financiamento, que salvo excepción motivada será a contida na envolvente económico financeira do orzamento.

b) Premisas principais de formulación do plan, consonte ás liñas estratéxicas da entidade.

c) Previsións plurianuais dos obxectivos a acadar e indicadores de seguimento das mesmas.

d) Memoria das principais actuacións da entidade.

e) Programa de investimentos.

f) Plan financeiro do período que cuantificará os recursos e as fontes externas de financiamento.

g) A restante documentación que determine a Consellería competente en materia de Facenda.

3.- Os orzamentos de explotación e de capital remitiranse polas entidades instrumentais con orzamento estimativo, conxuntamente co plan de actuación, investimentos e financiamento actualizado á consellería á que estean adscritos, para a súa posterior remisión, antes do 10 de xullo de cada ano, á consellería competente en materia de facenda. A estrutura básica e a documentación complementaria dos anteditos documentos establecerase pola consellería competente en materia de facenda.

4.- O plan de actuación, investimentos e financiamento someterase ao acordo do Consello da Xunta de Galicia antes do 1 de maio de cada ano, a proposta do conselleiro competente en materia de Facenda. A estes efectos, as entidades elaborarán oportunamente as adaptacións que sexan precisas, dimanantes do proceso de aprobación polo Parlamento de Galicia dos seus orzamentos de explotación e de capital e remitiranos á consellería competente en materia de facenda a través do departamento do que dependan.

5.- Cando unha consellería non houbera remitido en tempo e forma o plan de actuación, investimentos e financiamento dalgunha das entidades instrumentais que tivera adscritas, entenderase prorrogado o último presentado. Porén axustaranse as transferencias de funcionamento en función das normas de prórroga previstas no artigo 54 desta lei. “

Artigo 16º.- *Modificacións orzamentarias.*

Modifícase o artigo 85 do Texto refundido da Lei de réxime financeiro e orzamentario de Galicia, aprobado polo Decreto lexislativo 1/1999, do 7 de outubro, que queda redactado como segue:

“Artigo 85.- Modificacións orzamentarias

1.- As entidades instrumentais con orzamento estimativo dirixirán o seu funcionamento á consecución dos obxectivos recollidos nos seus orzamentos de explotación e de capital e nos seus programas de actuación investimentos e financiamento, no seu caso. Estes obxectivos deben ser coherentes cos do programa que conteña as partidas que financian a entidade.

2.- Cando algunha das entidades ás que refire o apartado anterior reciba con cargo aos orzamentos xerais da comunidade autónoma subvencións de explotación ou de capital ou outra achega de calquera natureza, as autorizacións das variacións anuais que supoñan incremento de dotacións dos seus orzamentos de explotación e capital axustaranse ao seguinte:

a) Se a variación atinxe ás transferencias de funcionamento e achegas autonómicas recollidas nos orzamentos xerais da Comunidade Autónoma de Galicia, a competencia corresponderalle á autoridade competente para tramitar as correspondentes modificacións do orzamento da comunidade autónoma.

b) Se a variación non atinxe ás anteditas transferencias e achegas autonómicas, será competencia do conselleiro de Facenda cando o seu importe non exceda do 10% de cada tipo de gasto por natureza (Persoal, resto de gasto corrente, investimentos reais ou financeiros, transferencias e subvencións de capital e endebedamento neto), e polo Consello da Xunta de Galicia nos demais casos.

3.- Requirirá autorización do Consello da Xunta o incremento da contía total que as entidades instrumentais adiquen ao financiamento dos PAIF de calquera outra entidade instrumental autonómica na que participen.

4.- Cando unha entidade instrumental adquira compromisos plurianuais que se haberán de financiar con achegas do orzamento da comunidade autónoma, a consellería financiadora deberá solicitar o informe ao que fai referencia o artigo 58 desta lei.”

Artigo 17º.- *Convenios coa Administración xeral da Comunidade Autónoma, organismos autónomos e axencias públicas autonómicas.*

Modifícase o artigo 86 do Texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, que queda redactado como segue:

“Artigo 86.- Convenios coa Administración xeral da Comunidade Autónoma, organismos autónomos e axencias públicas autonómicas.

1.- Nos supostos nos que se estipulen convenios e contratos-programa coa Administración xeral da Comunidade Autónoma, os organismos autónomos ou as axencias públicas autonómicas que dean lugar a réximes particulares de xestión, tanto polas entidades a que refire o apartado Un do artigo 82 bis desta lei como por calquera outra que reciba subvencións de explotación e de capital, avais ou outra achega de natureza distinta con cargo aos orzamentos xerais da Comunidade Autónoma de Galicia estableceranse, a lo menos, as correspondentes cláusulas sobre as seguintes materias:

- a) Hipóteses macroeconómicas e sectoriais que sirvan de base ao acordo.
- b) Obxectivos da política de persoal, rentabilidade, produtividade ou reestruturación técnica da explotación económica, así como métodos indicadores de avaliación de aqueles.
- c) Achegas con cargo aos orzamentos xerais da Comunidade Autónoma nas distintas modalidades a que se refire este apartado.
- d) Medios a empregar para adaptar os obxectivos acordados ás variacións habidas no respectivo entorno económico.
- e) Efectos que haberán de derivarse do incumprimento dos compromisos acordados.
- f) Control pola Consellería de Facenda da execución do convenio e dos resultados derivados da súa aplicación.

2.- O control anterior non excluírá o que poida corresponder aos respectivos depar-

tamentos ou organismos dos que dependan as entidades que suscribiran o correspondente convenio ou ás comisións de seguimento no caso dos contratos-programa.

3.- A subscrición do convenio ou contrato-programa a que se refiren os apartados anteriores non excluírá a elaboración, de forma coherente cos mesmos, do orzamento de explotación e de capital e do Plan de actuación, investimentos e financiamento (PAIF)."

CAPÍTULO II *Subvencións*

Artigo 18º.- *Ámbito de aplicación.*

Modifícase o artigo 3.1.b) da Lei 9/2007, do 13 de xuño, de subvencións de Galicia, que queda redactado como segue:

"b) Os organismos autónomos, axencias públicas autonómicas, entidades públicas empresariais e consorcios autonómicos."

Artigo 19º.- *Xustificación das subvencións.*

Modifícase o artigo 28.5 da Lei 9/2007, do 13 de xuño, de subvencións de Galicia, que queda redactado como segue:

"5. Nas subvencións concedidas a outras administracións públicas ou entidades vinculadas ou dependentes daquelas e ás universidades, a xustificación poderá consistir na certificación da intervención ou do órgano que teña atribuídas as facultades de control da toma de razón en contabilidade e do cumprimento da finalidade para a que foi concedida. Non obstante, para aquelas axudas e subvencións que se concedan con cargo a créditos financiados con recursos procedentes da Unión Europea, a xustificación dos gastos efectuarase con facturas ou documentos contables de valor probatorio equivalente e a do pagamento cos xustificantes das transferencias bancarias ou documentos acreditativos dos pagamentos realizados, de acordo coa normativa contida nos regulamentos aplicables aos fondos europeos."

Artigo 20º.- *Gastos subvencionables.*

Modifícase o artigo 29.3 da Lei 9/2007, do 13 de xuño, de subvencións de Galicia, que queda redactado como segue:

"3. Cando o importe do gasto subvencionable supere as contías establecidas na

Lei 30/2007, de 30 de outubro, de Contratos do Sector Público para o contrato menor, o beneficiario deberá solicitar como mínimo tres ofertas de diferentes provedores, con carácter previo á contratación do compromiso para a obra, a prestación do servizo ou a entrega do ben, salvo que polas súas especiais características non exista no mercado suficiente número de entidades que as realicen, presten ou subministren, ou salvo que o gasto se realizase con anterioridade á solicitude da subvención."

CAPÍTULO III *Xogo*

Artigo 21º.- *Concepto de xogo.*

Modifícase o artigo 2 da Lei 14/1985, do 23 de outubro, reguladora dos xogos e apostas en Galicia, que queda redactado como segue:

"Artigo 2.

Enténdese por xogo ou aposta para os efectos desta Lei calquera actividade, dependente da destreza ou do azar, mediante a que se arrisquen cantidades de diñeiro ou obxectos economicamente avaliábeis que permitan a súa transferencia entre os participantes, con independencia de que predomine o grao de habilidade ou destreza daqueles, ou sexa exclusiva de sorte, envite ou azar, tanto as realizadas por medios presenciais, como por canles electrónicas, informáticas, telemáticas e interactivas cando se desenvolvan dentro do ámbito da Comunidade Autónoma Galega."

Artigo 22º.- *Autorización da publicidade das actividades de xogo.*

Modifícase o artigo 5 da Lei 14/1985, do 23 de outubro, reguladora dos xogos e apostas en Galicia, que queda redactado como segue:

"1. Son xogos autorizados os determinados nesta lei.

2. A publicidade das actividades de xogo reguladas na presente Lei unicamente poderá efectuarse con autorización previa, coas excepcións previstas no punto 3 desta disposición. Os requisitos e as condicións necesarios para a concesión de tal autorización determinaranse regulamentariamente.

3. Non obstante o anterior, non será necesaria dita autorización para a publicidade realizada nos casos e coas condicións que se establezan na correspondente norma regulamentaria nin para a publicidade realizada en medios especializados en materia de xogo ou realizada noutros medios, que se limite exclusivamente aos seguintes aspectos:

a) Nome ou razón social, enderezo, teléfono, sitio web e dirección de correo electrónico da empresa de xogo e, no seu caso, do establecemento destinado á práctica de xogo.

b) Xogos e modalidades dos mesmos que se practiquen ou se ofrezan pola empresa autorizada.

c) Horario da actividade de xogo ou, no seu caso, días de práctica de xogo.

d) Servizos complementarios que preste o establecemento destinado á práctica de xogo e horario da súa prestación.

4. En calquera caso, a publicidade de calquera modalidade de xogo deberá axustarse á normativa específica sobre a publicidade. En particular queda prohibida a publicidade que utilice gráficos, textos ou mensaxes xenófobas, sexistas ou racistas, e a publicidade efectuada na radio ou na televisión, durante a emisión de programas ou espazos especialmente destinados ao público infantil.

5. Son xogos prohibidos todos os que non estean permitidos por esta lei e aqueles que, aínda que permitidos, se realicen sen a oportuna autorización ou na forma, lugar ou persoas distintas das que especifica esta lei.”

Artigo 23º.- *Instalación de aparellos para xogos nos establecementos de hostalería.*

Modifícase o artigo 11 da Lei 14/1985, do 23 de outubro, reguladora dos xogos e apostas en Galicia, que queda redactado como segue:

“Artigo 11.

Nos bares, cafeterías, establecementos de hostalería e análogos tan só se poderá instalar unha máquina de cada un dos tipos A, A especial e B. En ningún caso, a instalación de máquinas de xogo poderá desvirtuar nin impedir o desenvolvemento normal da actividade propia do establecemento. Así mesmo, poderá autorizarse a instalación de terminais de xogo de acordo co que se dispoña na normativa regulamentaria correspondente e nos termos de planificación que nela se fixen.

Reglamentariamente poderá limitarse o número total dos aparatos anteriormente citados neste tipo de establecementos.”

Artigo 24º.- *Clasificación das máquinas de xogo.*

Modifícase o artigo 17 da Lei 14/1985, do 23 de outubro, reguladora dos xogos e

apostas en Galicia, que queda redactado como segue:

“Artigo 17.

A efectos do seu réxime xurídico, as máquinas de xogo clasifícanse nos seguintes tipos:

1. Máquinas tipo “A” ou recreativas: son aquelas que a cambio dun prezo permiten ao usuario un tempo de recreo sen ningún tipo de premio nin contraprestación en diñeiro, en especie ou en forma de tickets ou vales con puntos cambiáveis por obxectos ou diñeiro, salvo a posibilidade de prolongación da propia partida ou doutras adicionais co mesmo importe inicial.

2. Máquinas tipo “A especial”: son aquelas que a cambio dun prezo permiten ao usuario un tempo de recreo e, eventualmente, obter un premio en diñeiro, en especie ou en forma de tickets, fichas vales ou similares, con puntos cambiáveis por obxectos ou diñeiro. Os premios outórganse conforme aos requisitos e aos límites que regulamentariamente se establezan e, en todo caso, serán inferiores aos previstos para as máquinas de tipo B.

3. Máquinas tipo “B” ou recreativas con premio programado: son aquelas que a cambio dun prezo permiten ao usuario un tempo de recreo e, eventualmente, obter un premio en diñeiro, de acordo co programa de xogo, cos límites que regulamentariamente se establezan.

4. Máquinas tipo “B especial”: son aquelas que a cambio dun prezo permiten ao usuario un tempo de recreo e, eventualmente, obter un premio en diñeiro, de acordo co programa de xogo, cos límites que regulamentariamente se establezan que, en todo caso, serán superiores aos previstos para as máquinas de tipo “B”. Estas máquinas serán de instalación exclusiva en Salóns de Xogo, Bingos e Casinos e terán un réxime xurídico propio séndolles de aplicación subsidiaria, para todo o non previsto especificamente para elas, a regulación das máquinas “B”.

5. Máquinas tipo “C” ou máquinas de azar: son aquelas que a cambio do prezo da partida, conceden ao usuario un tempo de uso ou de xogo e, eventualmente, un premio cos límites que regulamentariamente se establezan. Serán de instalación exclusiva en Casinos.

6. Regulamentariamente determinaranse as condicións de instalación de máquinas tipo “B”, “B especial” e “C”, multipostos, interconexionadas e/ou progresivas.

7. Sen prexuízo do sinalado nos apartados anteriores, o Consello da Xunta de Galicia, mediante Decreto, poderá, ademais de fixar os requisitos de homologación e contías, porcentaxes e límites de prezos e premios para cada tipo, incorporar á clasificación anterior outros tipos ou subgrupos de máquinas que, polas súas características, ou polo feito de

combinar modalidades, elementos ou mecanismos de diferentes xogos autorizados, non estivesen identificadas ou comprendidas nos antes sinalados.”

Artigo 25º.- *Modificación de disposicións adicionais da Lei de xogo.*

Un.- Modifícase a Disposición adicional primeira da Lei 14/1985, do 23 de outubro, reguladora dos xogos e apostas en Galicia, que queda redactada como segue:

“DISPOSICIÓN ADICIONAL PRIMEIRA.

O disposto nesta Lei enténdese sen prexuízo das competencias que correspondan ao Estado en materia de xogos e apostas.

Non obstante, a instalación e apertura de locais presenciais abertos ó público para a explotación de xogos e apostas da competencia do Estado, con exclusión dos supostos previstos no apartado cinco da disposición adicional primeira da Lei 13/2011, así como a instalación de terminais ou equipos que permitan a participación nos xogos, apostas e lotarías, tanto nos locais de xogo recollidos nesta lei como nos establecementos de hostalería e análogos ou en calquera outro local presencial aberto ao público, situado na Comunidade Autónoma de Galicia, requirirá a autorización administrativa da Comunidade Autónoma, todo isto de acordo cos criterios de planificación e ordenación da actividade do xogo que regulamentariamente se establezan, e conforme aos procedementos regulamentariamente esixidos .”

Dous.- Modifícase a letra II) da Disposición adicional cuarta da Lei 14/1985, do 23 de outubro, reguladora dos xogos e apostas en Galicia, que queda redactado como segue:

“II) Xogo do Bingo.

O xogo do bingo é un xogo de azar consistente na extracción de bólas con distintas numeracións depositadas nun bombo ou máquina mecánica, ou ben, mediante a súa xeración en soporte electrónico ou virtual dun número indeterminado de bólas, ata completar todas e cada unha das combinacións gañadoras establecidas, con dereito a premio, a medida que os números van sendo extraídos, xerados e anunciados. Conseguirán o premio o xogador ou xogadores que antes consigan completar os números que compoñen a combinación gañadora.

O xogo do bingo, na súa forma tradicional realizada por medios presenciais, xógase con 90 números do 1 ao 90, ambos os dous inclusive, tendo os xogadores como unidade de xogo cartóns integrados por quince números distintos entre si, distribuídos en tres liñas horizontais de cinco números cada unha e en nove columnas verticais, en calquera das cales pode haber tres, dous ou un número, pero sen que nunca haxa unha columna

sen número.

Nas restantes modalidades do xogo do bingo, sexa cal sexa a súa canle de explotación, poderá xogarse con máis ou menos de 90 números, distintos aos comprendidos entre o 1 e o 90 e con combinacións de composición diferente ás utilizadas no sistema tradicional en canto ao número de combinacións gañadoras e os números ou figuras que as integren de conformidade ao programa de xogo que se autorice.”

CAPÍTULO IV *Medio Ambiente*

Artigo 26º.- *Instrumentos de ordenación do territorio obxecto de avaliación ambiental estratéxica.*

Modifícase a letra a) do artigo 5 da Lei 6/2007, do 11 de maio, de medidas urxentes en materia de ordenación do territorio e do litoral de Galicia, que queda redactado como segue:

“a).- Os instrumentos de ordenación do territorio regulados na Lei 10/1995, do 23 de novembro, de ordenación do territorio de Galicia, agás os proxectos sectoriais de incidencia supramunicipal que serán obxecto de avaliación ambiental cando así o decida o órgano ambiental mediante decisión motivada, pública e axustada aos criterios establecidos polo anexo II da Lei 9/2006, de 28 de abril.”

Artigo 27º.- *Clasificación do grao de protección dos proxectos, obras e actividades suxeitas a trámite de avaliación da incidencia ambiental.*

Modifícase o apartado 2 do artigo 5 da Lei 1/1995, do 2 de xaneiro, de protección ambiental de Galicia, que queda redactado como segue:

“2. A clasificación do grao de protección para determinar o procedemento poderá ser:

- a. De avaliación do impacto ambiental.
- b. De avaliación da incidencia ambiental.”

CAPÍTULO V *Ordenación farmacéutica*

Artigo 28º.- *Medidas horarios servizos de garda farmacéutica.*

Engádese un novo apartado 5 ao artigo 17 da Lei 5/1999, do 21 de maio, de ordenación farmacéutica de Galicia, co seguinte contido:

“5. Con carácter de excepción ao disposto no apartado 2 deste artigo, e atendendo ás diferentes necesidades da asistencia farmacéutica, nas zonas farmacéuticas rurais con 3 ou menos oficinas de farmacia e que non dispoñan de PAC, a Secretaría Xeral Técnica da Consellería de Sanidade, logo da opinión das unidades responsables da consellería e do Sergas en materia de Ordenación Farmacéutica, por proposta do correspondente Colexio Oficial de Farmacéuticos, poderá autorizar mínimos de servizos de urxencia en horarios nocturnos inferiores aos regulamentariamente establecidos con carácter xeral, coa posibilidade de vincular o servizo farmacéutico ás zonas lindantes ou próximas, sempre que se asegure un adecuado servizo ao usuario”

Artigo 29º.- *Medidas relativas á atención farmacéutica nos hospitais, nos centros de asistencia social e nos psiquiátricos.*

Un.- Modifícase o apartado 2 do artigo 31 da lei 5/1999, do 21 de maio, de ordenación farmacéutica de Galicia, que queda redactado como segue:

“2. Será obrigatorio o establecemento dun servizo de farmacia propio en:

- a) Tódolos hospitais que teñan cen ou máis camas.
- b) Os centros de asistencia social que teñan cen camas ou máis en réxime de asistidos.
- c) Os centros psiquiátricos que teñan cen camas ou máis.

Non obstante o anterior, a consellería responsable en materia de prestación farmacéutica poderá establecer acordos ou convenios con centros hospitalarios privados, centros de asistencia social e centros psiquiátricos, co fin de asegurar unha mellora na xestión da atención farmacéutica, tanto dende o punto de vista da seguridade no manexo de produtos farmacéuticos como da racionalización do seu gasto.”

Dous.- Modifícase o artigo 34 da Lei 5/1999, do 21 de maio, de ordenación farmacéutica de Galicia, que queda redactado como segue:

“Artigo 34. Recursos humanos

1. Os hospitais con cen ou máis camas e os centros de asistencia social que teñan cen camas ou máis en réxime de asistidos que opten por un servizo de farmacia propio, deberán constituílo baixo a titularidade e responsabilidade dun farmacéutico especialista en farmacia hospitalaria.

2. Dependendo do volume, das actividades e do tipo de centro, establecerase regulamentariamente o número de farmacéuticos adicionais, técnicos ou auxiliares en farmacia, persoal administrativo e subalterno necesarios para desenvolver con normalidade o funcionamento do servizo.

3. Tódolos farmacéuticos que exerzan a súa actividade nos servizos de farmacia hospitalaria recollidos no apartado 1 deste artigo estarán en posesión do título de especialista en farmacia hospitalaria.”

Tres.- Modifícase o artigo 35 da Lei 5/1999, do 21 de maio, de ordenación farmacéutica de Galicia, que queda redactado como segue:

“Artigo 35.-Depósitos de medicamentos e produtos sanitarios.

1. Os centros hospitalarios, os centros de asistencia social que presten asistencia sanitaria específica e os psiquiátricos que non contén cun servizo de farmacia e que non estean obrigados a telo dispoñerán dun depósito, que estará vinculado a un servizo de farmacia da área sanitaria e baixo a responsabilidade do xefe do servizo, no caso dos hospitais do sector público, e a unha oficina de farmacia establecida na mesma zona farmacéutica ou a un servizo de farmacia, no suposto de que se trate dun hospital do sector privado.

Nos centros cos que se formalicen convenios ou acordos conforme ao artigo 31.3, poderán establecer depósitos de medicamentos vinculados ao servizo de farmacia do hospital da rede pública da área de influenza.

2. O depósito, dependendo da súa vinculación, será atendido por un farmacéutico do servizo de farmacia ou, se é o caso por un farmacéutico dos centros asistenciais do Servizo Galego de Saúde para os centros de asistencia social que formalicen acordos ou convenios conforme ao descrito no número 1 deste artigo ou por un farmacéutico vinculado á oficina de farmacia. O farmacéutico coa colaboración do persoal técnico ou auxiliar de farmacia necesario realizará as funcións seguintes:

a) Garanti-la correcta conservación, custodia e dispensación de medicamentos e produtos sanitarios para a súa aplicación dentro do centro.

b) Asegurar un sistema eficaz e seguro de dispensación de medicamentos e produtos sanitarios no centro, coa implantación de medidas que contribúan a garanti-la súa correcta administración.

- c) Establece-las normas de acceso ó depósito para o persoal previamente autorizado.
- d) Informa-lo persoal sanitario do centro e os propios pacientes en materia de medicamentos, así como realizar estudos de utilización de medicamentos.
- e) Colaborar coa Comisión de Farmacia e Terapéutica e cos comités éticos de investigación clínica, así como con outras comisións do centro hospitalario de referencia nas que os seus coñecementos poidan ser útiles.
- f) Garanti-las existencias necesarias para que a dispensación de medicamentos quede cuberta as vinte e catro horas do día.”

Artigo 30º.- Réxime sancionador.

Modifícase o artigo 57 da Lei 5/1999, do 21 de maio, de ordenación farmacéutica de Galicia, que queda redactado como segue:

“Artigo 57. Sancións.

I. As infraccións sinaladas nesta lei serán sancionadas, de conformidade co establecido no artigo 56, aplicando unha graduación mínima, media e máxima a cada nivel de infracción en función da negligencia e intencionalidade, do grao de conivencia, do incumprimento das advertencias previas, da cifra de negocios da entidade, do prexuízo causado e o número de persoas afectadas, dos beneficios obtidos coa infracción, da duración dos riscos xerados e do tipo de establecemento ou servizo no que se cometeu a infracción:

a) Infraccións leves:

Grao mínimo: Ata 6.000 euros.

Grao medio: Dende 6.001 a 18.000 euros.

Grao máximo: Dende 18.001 a 30.000 euros.

b) Infraccións graves:

Grao mínimo: Dende 30.001 a 60.000 euros.

Grao medio: Dende 60.001 a 78.000 euros.

Grao máximo: Dende 78.001 a 90.000 euros.

c) Infraccións moi graves:

Grao mínimo: Dende 90.001 a 300.000 euros.

Grao medio: Dende 300.001 a 600.000 euros.

Grao máximo: Dende 600.001 a 1.000.000 de euros, podendo rebasar dita cantidade ata alcanzar o quíntuplo do valor dos produtos ou servizos obxecto da infracción.

2. Sen prexuízo da multa que proceda impoñer conforme ao disposto no apartado anterior, as infraccións en materia de medicamentos serán sancionadas co comiso, en favor do Tesouro Público, do beneficio ilícito obtido como consecuencia da perpetración da infracción. A resolución da Administración determinará a estes efectos a contía do beneficio ilícito obtido.

3. As sancións pola comisión de infraccións graves e moi graves serán publicadas no diario oficial de Galicia unha vez que adquiriran firmeza en vía administrativa.

4. Ademais, nos supostos de infraccións moi graves poderá acordarse, polo Consello da Xunta, o peche temporal do establecemento, instalación ou servizo por un prazo máximo de cinco anos.

5. No caso das oficinas de farmacia, nos supostos de infraccións moi graves, poderá acordarse, polo Consello da Xunta a revogación da autorización administrativa e a prohibición do/a seu/súa titular de poder participar, perante un período de cinco anos dende que a sanción sexa firme en vía administrativa, en calquera concurso público que se celebre en Galicia para obter a autorización dunha oficina de farmacia."

CAPÍTULO VI *Saúde*

Artigo 31º.- *Titulares do dereito á protección da saúde e á atención sanitaria.*

Modifícase o apartado I do artigo 4 da Lei 8/2008, do 10 de xullo, de saúde de Galicia, que queda redactado da seguinte forma:

"I. O dereito á protección da saúde e á atención sanitaria con cargo a fondos públicos no ámbito da Comunidade Autónoma de Galicia e de cobertura universal garánteselles a todas as persoas que residan nos concellos desta comunidade autónoma.

Para acreditar a residencia prevista neste apartado terase en conta algún dos seguintes criterios:

- Que conste o empadramento en calquera dos concellos da Comunidade Autónoma con unha antigüidade de máis de 183 días.

- Que radique en Galicia o núcleo principal ou a base dos seus intereses económicos, de forma directa ou indirecta.

- Que residan habitualmente en Galicia o/a conxugue, ou a persoa con análoga relación de afectividade, non separado/a legalmente e os/as fillos/as menores de idade que dependan da persoa física.

Aos transeúntes e desprazados no territorio da comunidade garantiránelles na forma e nas condicións que estableza a lexislación vixente, o dereito comunitario e europeo e máis os convenios nacionais ou internacionais que resulten aplicables, así como a todos os galegos e galegas de orixe ou ascendencia que, residindo fóra de Galicia, se vexan amparados polos convenios para o efecto, no xeito e nas condicións establecidos neles. ”



DISPOSICIÓN DERROGATORIA

IV. DISPOSICIÓN DERROGATORIA

Única.-

Un.- Queda derrogado o artigo 13 da Lei 7/2002, do 27 de decembro, de medidas fiscais e de réxime administrativo

Dous.- Queda derrogada a Lei 7/1997, do 11 de agosto, de protección contra a contaminación acústica, así como a súa normativa de desenvolvemento.

No prazo dun ano, a Xunta de Galicia deberá aprobar un decreto no que se incorpore ó dereito económico a normativa europea e estatal básica en materia de contaminación acústica e se establezan as normas adicionais de protección que sexan oportunas.

Tres.- Queda derrogado o Capítulo III do Título II “Da avaliación de efectos ambientais”, artigos 10 a 12, ambos inclusive, da Lei 1/1995, do 2 de xaneiro de protección ambiental de Galicia.

Catro.- Quedan derrogados o punto 1 da disposición adicional primeira e as disposicións adicionais cuarta, quinta e sétima da Lei 9/2010, do 4 de novembro, de Augas de Galicia.



DISPOSICIÓN TRANSITORIA

V. DISPOSICIÓN TRANSITORIA

Única.-

Os procedementos de avaliación de efectos ambientais que se atopasen en curso á entrada en vigor desta lei continuarán a súa tramitación ate a formulación da declaración de efectos ambientais.



DISPOSICIÓN DERRADEIRAS

VI. DISPOSICIÓNS DERRADEIRAS

Primeira.- *Modificación da Lei 14/2007, do 30 de outubro, pola que se crea e regula o Instituto Galego de Seguridade e Saúde Laboral.*

Modifícase o apartado A) da disposición adicional 5ª da Lei 14/2007, do 30 de outubro, pola que se crea e regula o Instituto Galego de Seguridade e Saúde Laboral, que queda redactado como segue:

“A) Creación.

Ao abeiro do disposto na normativa vixente en materia de función pública de Galicia, créanse as seguintes escalas de persoal funcionario:

a) Da Administración xeral:

1) Dentro do corpo superior de Administración da Xunta de Galicia, subgrupo A1, créase a escala superior de seguridade e saúde no traballo.

2) Dentro do corpo de xestión de Administración da Xunta de Galicia, subgrupo A2, créase a escala técnica de seguridade e saúde no traballo.

Para o ingreso nelas requíranse as titulacións necesarias para o acceso ao subgrupo A1 e A2, respectivamente. As titulacións universitarias esixibles determínanse, en función da disciplina preventiva de que se trate, de acordo co seguinte:

I. Na escala superior de seguridade e saúde no traballo distínguense as seguintes subescalas:

a) Subescala de seguridade no traballo

Licenciatura ou grao en arquitectura e enxeñaría superior, máster en enxeñaría ou grao en enxeñaría.

b) Subescala de hixiene industrial

Licenciatura ou grao en química, bioloxía e farmacia.

c) Subescala de ergonomía e psicosocioloxía aplicada

Licenciatura ou grao en arquitectura, enxeñaría superior, máster en enxeñaría ou grao en enxeñaría e licenciatura ou grao.

2. Na escala técnica de seguridade e saúde no traballo distínguense as seguintes subescalas:

a) Subescala de seguridade no traballo

Arquitectura técnica, enxeñaría técnica, grao en enxeñaría da edificación ou grao en enxeñaría.

b) Subescala de hixiene industrial

Enxeñaría técnica industrial, enxeñaría técnica agrícola, enxeñaría técnica forestal, grao en enxeñaría en procesos químicos industriais, grao en enxeñaría en química industrial, grao en enxeñaría mecánica, grao en enxeñaría eléctrica, grao en enxeñaría electrónica industrial, grao en enxeñaría en deseño industrial e desenvolvemento do produto, grao en enxeñaría agrícola e de medio rural ou en enxeñaría de forestal ou grao en enxeñaría forestal e do medio rural.

c) Subescala de ergonomía e psicocioloxía aplicada

Enxeñaría técnica industrial, arquitectura técnica, grao en enxeñaría en procesos químicos industriais, grao en enxeñaría en química industrial, grao en enxeñaría mecánica, grao en enxeñaría eléctrica, grao en enxeñaría electrónica industrial, grao en enxeñaría en deseño industrial e desenvolvemento do produto, grao en enxeñaría da edificación, diplomatura universitaria ou grao.

Así mesmo, para as dúas escalas requírase o título de técnico ou técnica con formación en nivel superior, nas tres especialidades, conforme establece o Real decreto 39/1997, do 17 de xaneiro, polo que se aproba o Regulamento dos servizos de prevención.

Segundo os respectivos corpos, as funcións destas escalas serán exercer os labores técnicos en materia de prevención de riscos laborais de acordo co disposto na lexislación de prevención de riscos laborais, e en particular nos artigos 7.1 e 9.2 da Lei 31/1995, do 8 de novembro, nas áreas de seguridade no traballo, hixiene industrial e ergonomía e psicocioloxía aplicada, sen prexuízo das funcións que en materia mineira exerza o persoal funcionario con competencias en prevención de riscos laborais da consellería competente nesta área.

b) Da Administración especial:

1) Dentro do corpo facultativo superior da Xunta, subgrupo A1, créase a escala superior de saúde laboral.

2) Dentro do corpo facultativo de grao medio da Xunta de Galicia, subgrupo A2, créase a escala técnica de saúde laboral.

Para o ingreso na escala superior de saúde laboral será necesaria a titulación de licenciatura ou grao en medicina e cirurxía e título de médico ou médica especialista na especialidade de medicina do traballo ou a diplomatura en medicina de empresa.

Para o ingreso na escala técnica de saúde laboral será precisa a titulación de diplomatura ou grao en enfermaría/ATS, especialidade de enfermaría do traballo.

Segundo os respectivos corpos, as funcións destas escalas serán exercer os labores técnicos en materia de prevención de riscos laborais de acordo co disposto na lexislación de prevención de riscos laborais, e en particular nos artigos 7.1 e 9.2 da Lei 31/1995, do 8 de novembro, na área de medicina do traballo e vixilancia da saúde.”

Segunda.- *Modificación da Lei 8/2009, do 22 de decembro, pola que se regula o aproveitamento eólico en Galicia e se crean o canon eólico e o Fondo de Compensación Ambiental.*

Un.- Modifícanse os apartados 2, 3 e 4 do artigo 25 da Lei 8/2009, polo que se regula o aproveitamento eólico en Galicia e se crean o canon eólico e o Fondo de Compensación Ambiental, que quedan redactados como segue:

“2. Unha vez aplicado o disposto no punto anterior, a maior parte da contía dispoñible do fondo para cada exercicio, no importe que se fixe a través da orde reguladora, destinarase ás entidades cuxo termo municipal se atope dentro da poligonal de delimitación dun parque eólico ou resulten afectados polas correspondentes instalacións de conexión para a realización de:

a) Actuacións orientadas á conservación da biodiversidade, ao coñecemento e á utilización recreativa e didáctica dos recursos naturais e á recuperación do medio natural degradado ou contaminado.

b) Actuacións de impulso da eficiencia e utilización sustentable das enerxías renovables.

c) Outras actuacións de protección do medio ambiente e do contorno natural.

3. Os custos elixibles para efectos de distribución do fondo son os seguintes:

a) Investimentos en inmovilizado: custo de man de obra externa, execución material, equipos e instalacións.

b) Custos de proxecto e dirección de obra se se trata de contratacións externas.

c) Custos de funcionamento dos servizos municipais dedicados á protección do medio ambiente e do contorno natural.

4. A cantidade asignada a cada proxecto destinarase en función do orzamento presentado pola entidade local solicitante e non poderá superar o 100% do dito orzamento.”

Dous.- Modifícase a Disposición adicional segunda da Lei 8/2009, do 22 de decembro, pola que se regula o aproveitamento eólico en Galicia e se crean o canon eólico e o Fondo de Compensación Ambiental, que queda redactado como segue:

“Disposición adicional segunda. Creación da comisión de seguimento da execución dos proxectos de desenvolvemento de natureza industrial e do resto de criterios de selección vinculados aos parques eólicos adxudicados dentro das ordes de convocatoria que regula esta lei.

Co fin de levar a cabo o seguimento da execución dos proxectos de natureza industrial e do resto de criterios de selección vinculados aos parques eólicos adxudicados dentro das ordes de convocatoria que regula esta lei, créase unha comisión de seguimento e control que garantirá a execución das actuacións polas que os proxectos eólicos foron seleccionados.

A comisión de seguimento e control estará integrada por seis membros, e funcionará en pleno e por seccións. Exercerá a súa presidencia o titular da dirección do Instituto Enerxético de Galicia (INEGA), quen nomeará os cinco membros restantes. Será designado como secretario da comisión un dos seus membros, distinto do que exerza a presidencia.

A concreción dos fins da comisión, a súa organización e funcionamento desenvólvanse regulamentariamente mediante orde da consellería con competencias en materia de enerxía.

A constitución e posta en funcionamento desta comisión non supoñerán incremento do gasto público”.

Tres.- Engádese unha nova Disposición transitoria quinta á Lei 8/2009, do 22 de decembro, pola que se regula o aproveitamento eólico en Galicia e se crean o canon eólico e o Fondo de Compensación Ambiental, co seguinte contido:

“Disposición transitoria quinta.- Suspensión da tramitación de parques eólicos na ampliación da rede natura.

1. O anuncio de exposición pública da proposta de ampliación do ámbito da Rede Natura 2000 determinará por si mesmo a suspensión do procedemento de autorización dos parques eólicos que se sitúen, en todo ou en parte, no ámbito territorial obxecto de ampliación, ata a aprobación da proposta de ampliación polo Consello da Xunta de Galicia.

2. Aprobada no seu caso a proposta de ampliación da Rede Natura 2000 estarase ao

disposto no artigo 31 da presente Lei.

3. Facúltase á persoa titular da Dirección Xeral de Industria, Enerxía e Minas para ditar cantas disposicións sexan precisas para garantir a finalidade desta disposición.”

Terceira.- *Modificación da Lei 16/2010, do 17 de decembro, de organización e funcionamento da Administración xeral e do sector público autonómico de Galicia.*

Un.- Modifícase a disposición adicional sétima da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, que quedará redactado como segue:

“Sétima.- Réxime de contratación das entidades públicas empresariais.

As entidades públicas empresariais reguladas nesta lei teñen o carácter de organismos asimilados ás entidades públicas empresariais estatais, para os efectos do previsto no último parágrafo do punto 2 do artigo 3º da Lei 30/2007, do 30 de outubro, de contratos do sector público, agás que unha norma con rango de lei, en atención ás características da entidade ou da súa actividade e dos fins institucionais de carácter público que a súa contratación perseque, determine a suxeición desta actividade contractual á lexislación de contratos do sector público como administración pública.”

Dous.- Modifícase a disposición transitoria terceira da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, que quedará redactado como segue:

“ 4. As normas de organización e funcionamento e os estatutos de Portos de Galicia e da Compañía de Radiotelevisión de Galicia adecuaranse ao disposto nesta lei para as entidades públicas empresariais, por proposta conxunta dos titulares das consellarías competentes en materia de administración pública e de facenda, e modificarán, de ser o caso, as súas denominacións.”

Tres.- Engádese un novo apartado 5 bis a disposición transitoria terceira da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, que quedará redactado como segue:

“ 5 bis. A entidade de dereito público Augas de Galicia creada pola Lei 9/2010, de 4 de novembro, axustarase ao réxime xurídico previsto para as entidades públicas empresariais na presente Lei, en especial no relativo á materia de persoal. Nesta entidade pública integrárase a Empresa Pública de Obras e Servizos Hidráulicos de Galicia.

O organismo autónomo Augas de Galicia e a Empresa Pública de Obras e Servizos

Hidráulicos rexerase pola súa normativa específica ata a data de extinción de ambas entidades coa entrada en funcionamento do novo organismo público Augas de Galicia.

En atención as características da entidade, da súa actividade e dos fins institucionais de carácter público que a súa contratación persecue, esta entidade suxeitará a súa actividade contractual á Lei 30/2007, do 30 de outubro, de contratos do sector público, como administración pública.”

Cuarta.- *Entrada en vigor.*

Esta lei entrará en vigor o 1 de xaneiro de 2012, agás o artigo 2 que terá efectos dende o 31 de decembro de 2011.